



74  
6640  
65



74  
680  
65



五禮通考卷第一百七十一

內廷供奉禮部右侍郎金匱秦蕙田編輯

翰林院編修嘉慶錢大昕

李太僕總督魏都御史桐城方觀承同訂

嘉慶監察司副使元和宋宗元

嘉禮四十四

學禮

漢書武帝紀孝武初立卓然罷黜百家表章六經興太

三輔黃圖太學在長安西北七里市有獄

董仲舒傳仲舒對策曰養士之大者莫大乎太學太

學者賢士之所關也教化之本原也臣願陛下興太

學置明師以養天下之士數考問以盡其材則英俊

宜可得矣後武帝立學校之官皆仲舒發之

儒林傳公孫弘為學官悼道之鬱滯迺請白丞相御史

五禮通考卷一百七十一 學禮

木下中也  
奇贈

91-0742

言制曰蓋聞導民以禮風之以樂婚姻者居室之大倫也今禮廢樂崩朕甚愍焉故詳延天下方聞之士咸登諸朝其令禮官勸學講議洽聞舉遺興禮以爲天下先太常議與博士弟子崇鄉里之化以厲賢材焉謹與太常臧博士平等議曰間三代之道鄉里有教夏曰校殷曰序周曰庠其勸善也顯之朝廷其懲惡也加之刑罰故教化之行也建首善自京師始繇內及外今陛下昭至德開大明配天地本人倫勸學興禮崇化厲賢以風四方太平之原也古者政教未洽不備其禮請因舊官而興焉爲博士官置弟子五十人復其身太常擇民年十八以上儀狀端正者補博士弟子郡國縣官有好文學敬長上肅政教順鄉里出入不悖所聞令相長丞上屬所二千石二千石謹察可者常與計偕詣太常得受

業如弟子一歲皆輒課能通一藝以上補文學掌故缺其高第可以爲郎中太常籍奏卽有秀才異等輒以名聞其不事學若下材及不能通一藝輒罷之而請諸能稱者臣謹案詔書律令下者明天人分際通古今之誼文章爾雅訓辭深厚恩施甚美小吏淺聞弗能究宣亡以明布論下以治禮掌故以文學禮義爲官遷留滯請選擇其秩比二百石以上及吏百石通一藝以上補左右內史大行卒史比百石以下補郡太守卒史皆各二人邊郡一人先用誦多者不足擇掌故以補中二千石屬文學掌故補郡屬備員請著功令它如律令制曰可自此以來公卿大夫士吏彬彬多文學之士矣

蕙田案武帝紀事在元朔五年馬端臨云前此博士雖各以經授徒而無考察試用之法

至是官始為置弟子員所謂興太學也

昭帝時增博士弟子員滿百人宣帝末增倍之元帝好儒能通一經者皆復數年以用度不足更為設員千入成帝末或言孔子布衣養徒三千人今天子太學弟子少於是增弟子員三千人歲餘復如故平帝時王莽秉政增元士之子得受業如弟子勿以為員歲課甲科四十人為郎中乙科二十人為太子舍人丙科四十人補文學掌故云

班氏固曰自武帝立五經博士開弟子員設科射策勸以官祿訖於元始百有餘年傳業者寔盛枝葉蕃滋一經說至百餘萬言大師眾至千餘人蓋祿利之路然也

馬氏延鸞曰西漢博士隸太常有周成均隸宗伯之意州有博士郡有文學掾五經之師儒官之官長吏辟置布列郡國亦有黨庠遂序之意然有二失鄉里學校不升於大學而補弟子員者自一項人公卿弟子不養於太學而任子蓋隸光祿勳自有四利考試殊塗異方下之心術分裂不一上之考察馳騫不精

### 右西漢國學

後漢書儒林傳光武中興先訪儒雅四方學士雲會京師於是立五經博士各以其家法教授凡十四博士太常差次總領焉

建武五年乃修起太學稽式古典籩豆干戚之容備之於列服方領習矩步者委它乎其中

陸機雜陽記太學在雒陽城故開陽門陽去宮八里講堂長十丈廣三丈

中元元年初建三雍

漢官儀辟雍去明堂三百步車駕臨辟雍從北門入三月九月皆於中行鄉射禮辟雍以水周其外以節

觀者

蕙田案漢書河閒獻王來朝對三雍宮注以三雍為明堂辟雍靈臺兒寬亦云陛下發憤祖立明堂辟雍則西京已有之

馬氏端臨曰東漢時辟雍為天子養老大射行禮之所太學為博士弟子受業之所析為二處與古異夫太學辟雍固不可析為二處養老大射傳道受業又豈可分為二事哉

明帝本紀永平九年為四姓小侯開立學校置五經師順帝本紀永建六年九月繕起太學

翟酺傳酺上言孝文皇帝始置一經博士武帝大合天下之書而孝宣論六經於石渠學者滋盛弟子萬數光武初興愍其荒廢起太學博士舍內外講堂諸生橫巷為海內所集明帝時辟雍始成欲毀太學太尉趙熹以為太學辟雍皆宜兼存故並傳至今而頃

者頽廢至為園採芻牧之處宜更修繕誘進後學帝從之學者為酺立碑銘於學

儒林傳安帝覽政薄於藝文博士倚席不講學舍頽敝鞠為園蔬牧兒蕘豎至於薪刈其下順帝感翟酺之言乃更修覺宇凡所造構二百四十房千八百五十室試明經下第補弟子增甲乙之科員各十人

順帝本紀陽嘉元年七月以太學新成試明經下第者補弟子增甲乙科員各十人除郡國者儒九十九人補郎舍人

左雄傳雄又奏徵海內名儒為博士使公卿子弟為諸生有志操者加其俸祿及汝南謝廉河南趙建年始十二各能通經雄並奏拜童子郎於是負書來學雲集京師

質帝本紀本初元年四月令郡國舉明經年五十以上七十以下詣太學自大將軍至六百石皆遣子受業歲滿課試以高第五人補郎中次五人太子舍人又千石六百石四府掾屬三署郎四姓小侯先能通經者各令隨家法其高第者上名牒以次賞進

儒林傳太初元年梁太后詔曰大將軍下至六百石悉遣子就學每歲輒於鄉射月一饗會之以此爲常自是游學增盛至三萬餘生然章句漸疏而多以浮華相尙儒者之風益衰矣

續漢書五行志桓帝延熹五年太學門無故自壞襄楷以爲太學前疑所居其門自壞文德將喪教化廢也後漢書黨錮傳桓帝時太學諸生三萬餘人郭林宗賈偉節爲之冠與李膺陳蕃王暢更相褒重白公卿以下

莫不畏其貶議屣履到門牢修乃上書誣告膺等養太學遊士交結諸郡生徒更相驅馳共爲朋黨誹訕朝廷疑亂風俗天子震怒命郡國捕黨人收執膺等辭所連及陳寔之徒二百餘人

文獻通考建和初詔諸學生年十六以上比郡國明經試次第上名高第十五人上第十六人爲郎中第十七人爲太子舍人下第十七人爲王家郎永壽二年詔復課試諸生補郎舍人其後復制學生滿二歲試通二經者補文學掌故其不能通二經者須後試復隨輩試之通二經者亦得爲文學掌故其已爲文學掌故者滿二歲試能通三經者擢其高第爲太子舍人其不得第者後試復隨輩試第後高者亦得爲太子舍人已爲太子舍人滿二歲試能通四經者推其高第爲郎中其不得

五禮通考卷一百一十五  
第者後試復隨輩試第復高者亦得為郎中滿二歲試  
能通五經者推其高第補吏隨才而用其不得第者後  
試復隨輩試第後高者亦得補吏

靈帝熹平五年試太學生年十六以上百餘人除郎中  
太子舍人至王家郎郡國文學吏

後漢書靈帝本紀光和元年二月始置鴻都門學生

鴻都門名也  
於內置學

蔡邕傳初帝好學自造皇義篇五十章因引諸生能  
為文賦者本頗以經術相招後諸為尺牘及工書鳥  
篆者皆加引召遂至數十人侍中祭酒樂松賈護多  
引無行趣執之徒並待制鴻都門下喜陳方俗閭里  
小事帝甚悅之待以不次之位邕上封事曰古者取  
士必使諸侯歲貢孝武之世郡舉孝廉又有賢良文

學之選於是名臣輩出文武並興漢之得人數路而  
已夫書畫辭賦才之小者匡國理政未有其能陛下  
即位之初先涉經術聽政餘日觀省篇章聊以游意  
當代博奕非以教化取士之本而諸生競利作者鼎  
沸其高者頗引經訓風喻之言下則連偶俗語有類  
俳優或竊成文虛冒名氏臣每受詔於盛化門差次  
錄第其未及者亦復隨輩皆見拜擢既加之恩難復  
收改但守奉祿於義已宏不可復使理人及仕州郡  
昔孝宣會諸儒於石渠章帝集學士於白虎通經釋  
義其事優大文武之道所宜從之若乃小能小善雖  
有可觀孔子以為致遠則泥君子故當志其大者光  
和元年遂置鴻都門學畫孔子及七十二弟子象其  
諸生皆敕州郡三公舉用辟召或出為刺史太守入

為尚書侍中乃有封侯賜爵者士君子皆恥與為列焉

馬氏廷鸞曰鴻都門漢官門也太子保之廢來歷與九卿朝臣俱詣鴻都門證太子無過即其所也太學公學也鴻都學私學也學乃天下公而以爲人主私可乎是以士君子之欲與爲列者則以爲恥公卿

州郡之舉辟也必敕書強之人心之公豈可誣也馬氏端臨曰靈帝之鴻都門學即西都孝武時待詔金馬門之比也然武帝時雖文學如司馬遷相如枚舉東方朔董亦俱以排優畜之固未嘗任以要職而靈帝時鴻都門學之士至有封侯賜爵者士君子皆恥與爲列則其人品可知然當太學諸生三萬餘人其持危言嚴論以激濁揚清自負者誅戮禁錮殆靡子遺而其在學授業者至爭第更相告訟無復廉恥且當時在仕路者上自公卿下至孝廉茂材皆西園諸價獻修宮錢之人矣於鴻都學士乎何誅

獻帝本紀初平四年九月試儒生四十餘人上第賜位郎中次太子舍人下第者罷之詔曰孔子歎學之不講不講則所識日忘今者儒年踰六十去離本土營求糧資不得事業結童入學白首空歸長委農野永絕榮望朕甚憫焉其依科罷者聽爲太子舍人

右後漢國學

魏志文帝紀黃初五年四月立太學制五經課試之法魚豢魏略黃初元年之後新主乃埽除太學之灰炭補舊石碑之缺壞備學士之員錄依漢甲乙以考課申告州郡有欲學者皆遣詣太學太學始開有弟子數百人至太和中中外多事人懷避就雖性非解學多求詣太學太學諸生有千數而諸博士率皆麤疎無以教弟子弟子本亦避役竟無能習學冬來春去歲歲如是魏志劉馥傳馥子靖上疏陳儒訓之本曰自黃初以來崇立太學二十餘年而寡有成者蓋由博士選輕諸生避役高門子弟恥非其倫故夫學者雖有其名而無其人雖設其教而無其功宜高選博士取行爲人表經任人師者掌教國子依遵古法使二千石以上子孫年從十五皆入太學明制緘陟榮辱之路其經明行修者則



進之以崇德荒教廢業者則退之以懲惡舉善而教不能則勸浮華交遊不禁自息矣

蕙田案宋書禮志以爲馥所上疏與三國志不同考馥以建安十三年卒而此疏乃在齊王正始中則宋志誤也文獻通考亦承其誤宋書禮志孫休永安元年詔置學官立五經博士覈取應選加其寵祿科見史之中及將吏子弟有志好者各令就業一歲課試差其品第加以位賞

右三國國學

宋書禮志晉武帝太始八年有司奏太學生七千餘人才任四品聽留詔已試經者留之其餘遣還郡國大臣子弟堪受教者令入學

咸甯二年起國子學蓋周禮國之貴游子弟所謂國子受教於師氏者也

晉書職官志咸甯四年武帝初立國子學定置國子祭酒博士各一人助教十五人以教生徒博士皆取履行清白通明典義者若散騎常侍中書侍郎太子中庶子以上乃得召試

蕙田案國子學之名始於此東漢立五經博士十四人以聰明有威重者一人爲祭酒祭酒者眾所尊之稱陳元爲司空南閣祭酒則公府亦有祭酒矣晉時公府掾屬設東閣祭酒西閣祭酒軍諮祭酒而國子學亦設之唐以後惟國子監有祭酒而諸曹並不設是官矣 晉立國子學宋志在咸甯二年晉志在四年必有一誤

宋書禮志太康五年修作明堂辟雍靈臺

文獻通考成帝咸康三年國子祭酒袁瓌太常馮懷以江左浸安請興學校帝從之乃立太學徵生徒而士大夫習尚老莊儒術終不振

宋書禮志孝武太元初於中堂立行太學於時無復國子生置太學生六十人國子生權銓大臣子孫六十人

事訖罷  
太元九年尚書謝石請興復國學以訓胄子頒下州郡普修鄉校烈宗納其言其年選公卿二千石子弟為生增造廟房屋百五十五間而品課無章君子恥與其列國子祭酒殷茂言臣聞舊制國學生皆冠族華胄比列皇儲而中者混雜蘭艾遂令人情恥之詔褒納竟不施行

右晉國學

宋書禮志宋高祖受命詔有司立學未就而崩太祖元

嘉二十年復立國子學二十七年廢

通鑑帝雅好藝文使丹陽尹廬江何尚之立元學太子率更令何承天立史學司徒參軍謝元立文學散騎常侍雷次宗立儒學為四學

司馬氏光曰君子多識前言往行以畜其德孔子曰辭達而已矣然則史者儒之一端文者儒之餘事至於老莊虛無固非所以為教也夫學者所以求道天下無二道安有四學哉

南齊書禮志建元四年正月詔立國學置學生百五十人其有位樂入者五十人生年十五以上二十以還取王公已下子孫悉取家去都二千里為限太祖崩乃止

張緒傳初立國學以緒為太常卿領國子祭酒

馬氏廷鸞曰齊高即位之初求直言崔祖思以為人不學則不知道此逆亂之所由生宜開文武一學使人依方習業優殊者待以不次此國學之所以置歟張緒見謂風流在清簡寡欲之目以為有正始之風善清言而已師道不止於清言然當時以為極選矣是春置學秋以國衣罷曾不及歲江左之學校如此

禮志永明三年正月詔立學創立堂宇召公卿子弟下

及員外郎之嗣凡置生二百二十人其年秋中悉集

王儉傳永明三年領國子祭酒省總明觀於儉宅開

學士館悉以四部書充儉家詔儉以家為府十日一

還學監試諸生巾卷在庭劍衛令史儀容甚盛

禮志建武四年正月詔立學

永泰元年東昏侯即位尚書符依永明舊事廢學領國

子助教曹思文上表曰今制書始下而廢學先聞將恐

觀國之光者有以擬議也若以國諱宜廢昔漢成立學

爰洎元始百餘年中未嘗暫廢其間有國諱也且晉武

之崩其學猶存斯皆先代不以國諱而廢學之明文也

永明以無太子故廢斯非古典今之國學即古之太學

天子入國學以行禮也太子入國學以齒讓也太學之

與國學斯是晉世殊其士庶異其貴賤耳然貴賤士庶

皆須教成故國學太學兩存之也非有太子故立也今

學非惟不宜廢而已乃宜更崇向其道使郡縣有學鄉

閭立教請付尚書及二學詳議有司奏從之學竟不立

隋書百官志梁國學有祭酒一人博士二人助教十人

太學博士八人天監四年置五經博士各一人舊國子

學生限以貴賤帝欲招來後進五館生皆引寒門雋才

不限人數

胡氏寅曰史稱武帝雅好儒術至是置五經博士開館宇招後進四館所養士踰千人射策通明者除吏又修孔子廟以示尊師他日又幸國子監親臨講肆且令皇太子及王侯之子年可從師者皆入學可謂勤矣然儒風不振人才不出何也帝心尚佛自天監改元即不肉食此躬行也故特以美行興學養士攷

人不從其命而從其意乃身率令乃文具其後綱維不立人紀  
胥廢國破身隕為萬世笑蓋始於此人主心術所寄可不慎哉

陳書儒林傳高祖創業日不暇給弗遑勸課世祖以降

稍置學官雖博延生徒成業蓋寡

魏書儒林傳太祖初定中原始建都邑立太學置五經

博士生員千有餘人天興二年增國子太學生員至三

千

太宗時改國子為中書學立教授博士

世祖始光三年春別立太學於城東

高祖太和中改中書學為國子學建明堂辟雍又開皇

子之學及遷都洛陽立國子太學四門小學

蕙田案四門小學始於此

世宗時復詔營國學樹小學於四門大選儒生以為小

學博士員四十人雖鬻字未立而經術彌顯時天下承

平學業大盛故燕齊趙魏之間橫經著錄不可勝數大

者千餘人小者猶數百

正光三年始置國子生三十六人

隋書百官志後齊國子寺掌訓教胄子祭酒一人領博

士五人助教十人學生七十二人太學博士十人助教

二十人太學生二百人四門學博士二十人助教二十

人學生三百人

北齊書儒林傳齊氏太學博士徒有虛名唯國子一學

生徒數十人耳胄子以通經進仕者唯博陵崔子發廣

平宋游卿而已

周書武帝紀天和元年七月詔諸胄子入學但東脩於

師不勞釋奠釋奠者學成之祭自今永以為式

右南北朝國學

隋書百官志隋國子寺祭酒一人統國子太學四門書算學各置博士國子太學四門各五人書算各二人助教國子太學四門各五人書算各二人學生國子一百四十人太學四門各三百六十人書四十八人算八十八人

蕙田案國子寺不隸太常自隋始

仁壽元年罷國子學唯立太學一所置博士五人學生七十二人

高祖本紀仁壽元年六月詔國子學唯留學生七十人太學四門及州縣學並廢七月改國子為太學

儒林傳開皇二十年廢國子四門及州縣學惟置太學博士二人學生七十二人劉炫上表言學校不宜廢情理甚切高祖不納

蕙田案本紀及百官志俱云仁壽元年此傳

稱開皇二十年疑誤

百官志煬帝即位國子監依舊置祭酒加置司業一人丞三人國子學置博士助教各一人學生無常員太學博士助教各二人學生五百人

蕙田案國子學置司業始於此

右隋國學

唐書選舉志唐制凡學六皆隸於國子監國子學生三百人以文武三品以上子孫若從二品以上曾孫及勳官二品縣公京官四品帶三品勳封之子為之太學生五百人以五品以上子孫職事官五品其親若三品曾孫及勳官三品以上有封之子為之四門學生千三百人其五百人以勳官三品以上無封四品有封及文武七品以上子為之八百人以庶人之俊異者為之律學

唐書選舉志三十一 國禮 三

生五十人書學生三十人算學生三十人以八品以下子及庶人之通其學者爲之國子監生尙書省補祭酒統焉凡館二門下省有宏文館生三十人東宮有崇文館生二十人以皇總麻以上親皇太后皇后大功以上親宰相及散官一品功臣身食實封者京官職事從三品中書黃門侍郎之子爲之凡博士助教分經授諸生未終經者無易業凡生限年十四以上十九以下律學十八以上二十五以下凡禮記春秋左氏傳爲大經詩周禮儀禮爲中經易尙書春秋公羊傳穀梁傳爲小經通二經者大經小經各一若中經二通三經者大經中經小經各一通五經者大經皆通餘經各一孝經論語皆兼通之凡治孝經論語其限一歲尙書公羊傳穀梁傳各一歲半易詩周禮儀禮各二歲禮記左氏傳各三

歲學書日紙一幅閒習時務策讀國語說文字林三蒼爾雅旬給假一日前假博士考試讀者千言試一帖帖三言講者二千言問大義一條總三條通二爲第不及者有罰歲終通一年之業口問大義十條通八爲上六爲中五爲下併三下與在學九歲不堪貢者罷歸諸學生通二經俊士通三經已及第而願畱者四門學生補太學太學生補國子學每歲五月有田假九月有授衣假二百里外給程其不帥教及歲中違程滿三十日事故百日緣親病二百日皆罷歸既罷條其狀下之屬所五品以上子孫送兵部準蔭配色

高祖卽位詔祕書外省別立小學以教宗室子孫及功臣子弟

太宗卽位於門下別置宏文館東宮置崇文館增築學

舍至千二百區雖七營飛騎亦置生遺博士為授經四  
夷若高麗百濟新羅高昌吐蕃相繼遣弟子入學遂至  
八千餘人

高宗龍朔二年東都置國子監明年以書學隸蘭臺算  
學隸祕閣律學隸詳刑

上元二年國子監置大成二十人取已及第而聰明者  
為之試書日誦千言并日試策所業十通七然後補其  
祿俸同直官通四經業成上於尚書吏部試之登第者  
加一階放選其不第則習業如初三歲而又試三試而  
不中第從常調

文獻通考中宗神龍二年敕學生在學各以長幼為序  
初入學皆行束脩之禮禮於師國子太學各絹三匹四  
門學絹二匹俊士及律書算學州縣各絹一匹皆有酒

脯其束脩三分入博士二分助教又每言國子監所管  
學生國子監試州縣學生當州試並選藝業優長者為  
試官監試

洪氏容齋隨筆唐六典國子生初入置束帛一篋酒一壺脩一案為束脩之禮  
太學四門律學書學算學皆如國子之法其習經有暇者命習隸書并國語說  
文字林三蒼爾雅每旬前一則則試其所習業乃知唐世士人多工書益在六  
館時以為常習其說文字林蒼爾雅諸書亦欲責以結字合於古義不特錄選之  
時方取楷書迺美者也束脩之禮乃於此見之開元禮載皇子束脩束帛一篋  
五匹酒一壺二斗脩一案三脰皇子服學生之服至學門外陳三物於西南少  
進曰某方受業於先生敢請見執籩者以進授皇子皇子跪奠籩再拜博士答  
再拜皇子還避遂進跪取篋博士受幣皇子拜訖乃出其儀如此州縣學生亦  
然

唐書選舉志中宗即位詔宗室三等以下五等以上未  
出身願宿衛及任國子生聽之其學業成而堪貴者宗  
正寺試送監舉如常法三衛番下日願入學者聽附國  
子學太學及律館習業蕃王及可汗子孫願入學者附  
國子學讀書

蕙田案附學生之名始於此

元宗開元七年令宏文崇文國子生季一朝參又敕州縣學生年二十五以下八品子若庶人二十一以下通一經及未通經而聰悟有文詞史學者入四門學為俊士即諸州貢舉省試不第願入學者聽

天寶十二載敕天下罷鄉貢舉人不由國子及郡縣學者勿舉送 十四載復鄉貢

代宗廣德二年詔曰古者設太學教胄子雖年穀不登兵革或動而俎豆之事不廢頃年戎車屢駕諸生輟講宜追學生在館習業度支給廚米

歸崇敬傳大歷初授國子司業三太子欲臨國學行齒胄禮崇敬以學與官名皆不正乃建議古天子學曰辟雍以制言之雍水環繚如璧然以誼言之以禮樂明和

天下云爾在禮為澤宮故前世或曰璧池或曰璧沼亦言學省漢光武立明堂辟雍靈臺號三雍宮晉武帝臨辟雍行鄉飲酒禮別立國子學以殊士庶永嘉南遷惟

有國子學隋大業中更名國子監今聲名之盛辟雍獨闕請以國子監為辟雍省祭酒司業之名非學官所宜業者柎簾大版今學不教樂於義無當請以祭酒為太

師氏位三品司業為左師右師位四品近世明經不課其義先取帖經頡門廢業傳授義絕請以禮記左氏春秋為大經周官儀禮毛詩為中經尚書周易為小經各

置博士一員公羊穀梁春秋共準一中經通置博士一員博士兼通孝經論語依章疏講解德行純絜文詞雅正形容莊重可為師表者委四品以上各舉所知在外給傳七十者安車蒲輪敦遣國子太學四門三館各立



五經博士品秩生徒有差舊博士助教直講經直律館  
算館助教請皆罷教授法學生謁師費用殿脩一束酒  
一壺衫布一裁色如師所服師出中門延入與坐割脩  
斟酒三爵止乃發篋出經摳衣前請師爲說經大畧然  
後就室朝晡請益師二時堂上訓授道義示以文行忠  
信孝悌睦友旬省月試時考歲貢眡生徒及第多少爲  
博士考課上下有不率教者檟楚之國子移禮部爲太  
學生太學又不變徙之四門四門不變徙本州之學復  
不變繇役如初終身不齒雖率教九年學不成者亦歸  
之本州禮部考試法請罷帖經於所習經問大義三十  
而得十八論語孝經十得八爲通策三道以本經對通  
二爲及第其孝行聞鄉里者舉解具言試日義闕一二  
許兼收焉天下鄉貢如之習業考試並以明經爲名得

第授官與進士同有詔尙書省集百官議皆以習俗久  
制度難分明省禁非外司所宜名周官世職者稱氏國  
學非世官不得名辟雍省大師氏大抵憚改作故無施  
行者

選舉志元和二年置東都監生一百員自天寶後學校  
益廢生徒流散永泰中雖置西監生而館無定員於是  
始定生員西京國子館生八十人太學七十人四門三  
百人廣文六十人律館二十人書算館各十人東都國  
子館十人太學十五人四門五十人廣文十人律館十  
人書館三人算館二人

韓氏愈請復國子監生徒疏國家典章崇重庠序近  
日趨競未復本原至使公卿子弟恥游太學工商凡  
冗或處上庠今聖道大明儒風復振恐須革正以贊

鴻猷今請國子館並依六典其太學館量許取無資  
廩有才業人充如有資廩不補學生應舉者請禮部  
不在收試限請牒送法司科罪緣今年舉期已近伏  
請去上都五百里內特賜非時收補其五百里外且  
任鄉貢至來年春一時收補其廚糧度支先給二百  
七十四人請準新補人數量加支給又論新注學官  
牒準今年赦文委國子祭酒選擇有經藝堪訓導生  
徒者以充學官近年吏部所注多循資叙不考藝能  
至令生徒不自勸勵伏請非專通經傳博涉墳史及  
進士五經諸色登科人不以比擬其新授官上日必  
加研試然後放上以副聖朝崇儒尚學之意  
文獻通考文宗太和七年赦節文應公卿士族子弟取  
來年正月已後不先入國學習業者不在應明經進士

之限

武宗會昌五年制公卿百官子弟及京畿內士人寄客  
修明經進士業者並隸名太學外州寄士人並隸名所  
在官學

右唐國學

文獻通考後唐天成三年正月中書門下奏伏以祭酒  
之資歷朝所貴爰從近代不重此官況屬聖朝方勤庶  
政須宏雅道以振時風望令宰相臣一員兼判國子祭  
酒敕宜令宰相崔協兼判其年八月十一日宰臣兼判  
國子祭酒崔協奏請國子每年祇置監生二百員候解  
送至十月三十日滿數爲定太學書生不得因此便取  
公牒輒免本戶差役又每年於二百人數內不繫時節  
有投名者先令學官考試校其學業深淺方議收補姓

名敕宜依

五年正月五日國子監奏當監舊例初補監生有束脩錢二千及第後光學錢一千竊緣當監諸色舉人及第後多不於監司出給光學文鈔及不納光學錢祇守選限年滿便赴南曹參選南曹近年磨勘選人並不收監司光學文鈔為憑請自今後欲準往例應色舉人及第後並先於監司出給光學文鈔并納光學錢等各自所業等第以備當監逐年公使奉敕宜準往例自今後凡補監生須令情願於監中修學則得給牒收補仍據所業次第逐季考試申奏如收補年深未聞藝業虛沾補牒不赴試期亦委監司具姓名申奏

馬氏瑞臨曰五代弊法凡官府公使錢多令居官者自出其費宰相則有光省錢御史則有光臺錢至於監生亦令其出光學錢則貢士何所從出既徵其錢復不蠲其役待士之意亦太薄矣然史所言多有未曾授業輒取解送者往往亂離之際其居學亦皆尚賤冒監之士耳

右後唐國學

宋史選舉志凡學皆隸國子監國子生以京朝七品以上子孫為之初無定員後以二百人為額太學生以八品以下子弟若庶人之俊異者為之

初國子監因周舊制頗增學舍以應廕子孫隸學受業開寶八年國子監上言生徒舊數七十人奉詔分習五經然繫籍者或久不至而在京進士諸科常赴講席肄業請以補監生之闕上從之

景德間許文武升朝官嫡親附國學取解而遠鄉久寓京師其文藝可稱有本鄉命官保任監官驗之亦聽附學充貢

慶曆四年天章閣侍講王洙言國子監每科場詔下許品官子弟投狀試藝給牒充廣文太學律學三館學生

多致千餘就試試已則生徒散歸講官倚席但為游寓之所殊無肄習之法居常聽講者一二十人爾迺限在學滿五百日舊已嘗充貢者止百日本授官會其實京朝官保任始預秋試每十人與解凡入學授業月旦即親書到歷如遇私故或疾告歸甯皆給假違程及期月不來參者去其籍後諫官余靖極言非便遂罷聽讀日限

馬氏端臨曰古人所謂中年考校九年大成者進德修業之事也至漢人之補博士弟子員則止限以通一經而後授之官唐人之法尚彷彿如此至宋熙豐後立三舍之法則不過試之以浮靡之文而誘之以利祿之塗然明經而必至於通一藝試文而必至於歷三舍皆非旦暮可就故國家雖未嘗嚴其法制稽其去留而為士者內恥於習業之未精外訪於榮華之可慕其坐學之日自不容不久今慶應之法所謂習業者雖有講肄聽讀而未嘗限以通經之歲月所謂榮塗者止於拔解赴省而未有優異之捷徑所以科場罷日則生徒散歸雖限以日月而不能強其久留反以淹滯為困故不久而遂廢也

蕙田案文獻通考王洙上言在慶歷二年余靖言在四年宋史併為一年事誤

文獻通考皇祐末以胡瑗為國子監講書專管勾太學數年進天章閣侍講猶兼學正其初人未信服謗議蜂起瑗不顧強力不倦以卒有立瑗在學時每公私試罷掌儀率諸生會於首善令雅樂歌詩一夜乃散諸齋亦自歌詩奏琴瑟之聲徹於外瑗在湖學教法最備始建大學有司請下湖學取瑗之法以為太學法至今為著令

神宗熙甯元年增太學生員慶歷中嘗置內舍生二百人至是又增置一百尋詔以九百人為額宋史選舉志熙甯四年盡以錫慶院及朝集院西廡建講書堂四諸生齋舍掌事者直廬始僅足用自主判官外增置直講為十員率一員共講一經令中書遴選或主判官奏舉生員釐為三等始入學為外舍初不限員

後定額七百人外舍升內舍員二百內舍升上舍員百  
各執一經從所講官受學月考試其業優等上之中書  
其正錄學諭以上舍生爲之經各二員學行卓異者主  
判直講復薦之中書奏除官

八年頒王安石書詩周禮義於學官是名三經新義

蕙田案神宗立三舍法專以學校取士其意  
非不善顧乃棄漢唐專門注疏之學而以安  
石新說頒之學官遂使學者厭故而喜新是  
今而非古欲以一道德成風俗豈不難乎

文獻通考元豐二年頒學令太學置八十齋齋各五楹  
容三十人外舍生二千人內舍生三百人上舍生百人  
月一私試歲一公試補內舍生閒歲一舍試補上舍生  
彌封謄錄如貢舉法而上舍試則學官不預考校公試

外舍生入第一第一等參以所書行藝與籍者升內舍  
內舍試入優平二等參以行藝升上舍上舍分三等俱  
優爲上一優一平爲中俱平若一優一否爲下上等命  
以官中等免禮部試下等免解學正增爲五人學錄增  
爲十人學錄參以學生爲之歲賜緡錢至二萬五千又  
益郡縣田租屋課息錢之類以爲學費學制所言國子  
監以國子名而實未嘗教養國子乃詔許清要官親戚  
入監爲國子生聽讀額二百人仍盡以開封府解額歸  
太學其國子生解額以太學分數取之毋過四十人  
哲宗元祐七年置廣文館解額先是開封解額稍優四  
方士子多冒畿縣戶以試又有隸太學不及一年不該  
解試者亦往往冒戶禮部按舊制凡試國子監者先補  
中廣文館生乃得以牒求試遂依倣其法立廣文館生

二千四百員除開封府元解百人則許自試其嘗撥取諸科二百國子額四十通二百四十人今皆以為本館解額遇科場年試補館生中者執牒詣國子監驗試凡試者十人取一開封考取亦如其數試者不及千人即以率減取仍嚴禁重試

紹聖元年國子監奏罷廣文館發解其額本取之開封府諸科及國子悉復還之凡學生自外路參假及新補中未該撥填入學者權附國子監別號試取一次

蕙田案宋時士子冒畿縣戶應試猶今之冒順天府籍入場也元祐置廣文館生以待四方游士試京師者額二千四百人其解額則二百四十所謂十人取一也如是既無冒戶之弊而四方士子在京者仍得升進之路似

亦可行也

宋史選舉志元祐新令罷推恩之制紹聖初監察御史郭知章言先帝立三舍法以歲月稽其行實故入上舍而中上等者得不經禮部試特命以官責備而持久故其得也難誘掖激勸莫善於此宜復元豐法以廣樂育之德又請三學補外舍生依元豐令一歲四試於是詔太學生悉用元豐制推恩上等即注官者歲毋過二人免禮部試者每舉五人而止免解試者二十人而止仍計數對除省試發解額其元祐法勿用諸三舍升補等法悉推行舊制

崇甯三年詔取士悉由學校升貢其州郡發解及試禮部並罷自是歲試上舍悉差知舉如禮部試五年著令太學試上舍生本慮與科舉相并試以閒歲

今既罷科舉又諸州歲貢士其改用歲試每春季太學  
辟雍生悉公試同院混取總五百七十四人以四十七  
人為上等即推恩釋褐一百四十人為中等遇親策士  
許入試一百八十七人為下等補內舍生凡上等上舍  
生暨特舉孝弟行能之士不待廷試推恩者許即引見  
釋褐上舍仍先以試文卷進入得可乃引賜若上舍已  
該釋褐恩而貢入在廷試前一年者須在學又及半年  
不犯上二等罰乃得注官

徽宗本紀重和元年詔太學辟雍各置內經道德經莊  
子列子博士二員

選舉志宣和三年詔罷天下州縣學三舍法惟太學用  
之課試開封府及諸路並以科舉取士

七年詔政和中嘗命學校分治黃老莊列之書實失專

經之旨其內經等書並罷治

建炎初即行在置國子監立博士二員以隨幸之士三  
十六人為監生

紹興十三年始建太學置祭酒司業各一員博士三員  
正錄各一員養士七百人上舍生三十員內舍生百員  
外舍生五百七十員凡諸道住本州學滿一年三試中  
選不犯第三等以上罰或不住學而曾兩預釋奠及齒  
於鄉飲酒者聽充弟子員每歲春秋兩試之旋命一歲  
一補於是多士雲集至分場試之俄又詔三年一試增  
至千員中選者皆給綾紙贊詞以寵之每科場四取其  
一自外舍有月校而公試入等曰內舍自內舍有月校  
而舍試入等曰上舍凡升上舍者皆直赴廷對  
二十七年立定制春季放補遇省試年改用孟夏

舊太學遇覃恩無免解法孝宗始勅行之在朝清要官  
期親許牒子弟作待補國子別號考校如太學生遇有  
期親任清要官更爲國子生不預校定升補及差職事  
惟得赴公私試科舉則混試焉 自中興以來四方之  
士有本貫在學公據皆得就補帝始加限節命諸路州  
軍以解試終場人數爲準其薦貢不盡者令百取六人  
赴太學謂之待補生其住本學及游學之類一切禁止  
元豐舊制內舍生校定分優平二等優等再赴舍試  
又入優則謂之兩優釋褐中選者卽命以京秩除學官  
至是始令先注職官代還注職事官恩例視進士第二  
人舊校定歲額五六分爲優選者增爲十分矣  
甯宗慶元嘉定中始兩行混補於是增外舍生爲千四  
百員內舍校定不係上舍試年分以八分爲優等又以

國子生員多僞濫命行在職事官期親釐務官子孫乃  
得試補

嘉定十四年詔自今待補百人取三人舊法自外舍升  
內舍雖有校試必公試合格乃許升補蓋私試皆學官  
自考而公試則降敕差官至是歲終許取外舍生校最  
優者一人升內舍

度宗咸淳三年正月幸太學謁先聖禮成推恩三學前  
廊與免省試內舍上舍及已免省試者與升甲起居學  
生與泛免一次內該曾經兩幸人與補上州文學如願  
在學者聽其在籍諸生地遠不及趁赴起居者三學申  
請乞併行泛免一次命特從之凡諸生升舍在幸學之  
前者方許陳乞恩例七年正月以壽和聖福皇太后兩  
上尊號推恩三學在齋生員並特與免解赴省一次



朱子學校貢舉私議學校必選實有道德之人使爲學官以來實學之士裁減解額舍選謬濫之恩以塞利誘之塗蓋古之太學主於教人而因以取士故士之來者爲義而不爲利且以本朝之事言之如李廌所記元祐侍講呂希哲之言曰仁宗之時太學之法寬簡國子先生必求天下賢士真可爲人師者就其中又擇其尤賢者如胡翼之之徒使專教導規矩之事故當是時天下之士不遠萬里來就師之其游太學者端爲道藝稱弟子者中心悅而誠服之蓋猶有古法之遺意也熙甯以來此法浸壞所謂太學者但爲聲利之場而掌其教事者不過取其善爲科舉之文而嘗得雋於場屋者耳士之有志於義理者既無求於學其奔趨輻輳而來者不過爲解額之濫舍選

之私而已師生相視漠然如行路之人間相與言亦未嘗開之以德行道藝之實而月書季考者又祇亦促其嗜利苟得冒昧無恥之心殊非國家之所以立學教人之本意也欲革其弊莫若一遵仁皇之制擇士之有道德可爲人師者以爲學官而久其任使之講明道藝以教訓其學者而又痛減解額之濫以還諸州罷去舍選之法而使爲之師者考察諸州所解德行之士與諸生之賢者而特命以官則太學之教不爲虛設而彼懷利干進之流自無所爲而至矣如此則待補之法固可罷去而混補者又必使與諸州科舉同日引試則彼有鄉舉之可望者自不復來而不患其紛冗矣至于取士之數則又嚴爲之額而許其補中之人從上幾分特赴省試則其舍鄉舉而來

赴補者亦不為甚失職矣其計會監試漕試附試之類亦當痛減分數嚴立告賞以絕其冒濫其諸州教官亦以德行人充而責以教導之實則州縣之學亦稍知義理之教而不但為科舉之學矣

蕙田案以上宋太學

文獻通考慶曆三年立四門學以士庶子弟為生員宋史選舉志初立四門學自八品至庶人子弟充學生歲一試補差學官鎖宿彌封校其藝疏名上聞而後給牒不中式者仍聽讀若三試不中則出之未幾學廢

蕙田案以上宋四門學

哲宗時初置在京小學曰就傅初筮凡兩齋政和四年小學生近一千人分十齋以處之自八歲至十二歲率以誦經書字多少差次補內舍若能文從博

士試本經小經義各一道稍通補內舍優補上舍

蕙田案以上宋小學

崇甯三年命將作少監李誠即城南門外相地營建外學是為辟雍蔡京又奏古者國內外皆有學周成均蓋在邦中而黨庠遂序則在國外臣親承聖詔天下皆興學貢士即國南郊建外學以受之俟其行藝中率然後升諸太學凡此聖意悉與古合今上其所當行者太學專處上舍內舍生而外學則處外舍生今貢士盛集欲增太學上舍至二百人內舍六百人外舍三千人外學為四講堂百齋齋列五楹一齋可容三十人土初貢至皆入外學經試補入上舍內舍始得進處太學太學外舍亦令出居外學其敕令格式悉用太學見制國子祭酒總治學事外學官屬司業丞各一人稍減太學博士

正錄員歸外學仍增博士爲十員正錄爲五員學生充  
學諭者十人直學二人三舍生皆繇升貢遂罷國子監  
補試

蕙田案文獻通考及徽宗本紀建外學在崇  
甯元年與志不同

五年著令凡州學上舍生升舍以其秋卽貢入辟雍長  
吏集闔郡官及提學官具宴設以禮敦遣限歲終悉集  
闕下 凡貢士入辟雍外舍三經試不與升補兩經試  
不入等仍犯上三等罰者削籍再赴本州歲升試是名  
退送卽內舍已降舍而又一試不與或兩犯上四等罰  
者亦如外舍法退送太學外舍生已預考察者許再經  
一試以中否爲留遺餘升降退送悉如辟雍法  
宣和三年詔太學官吏及州縣管置學官凡元豐舊制

所有者皆如故其辟雍官屬及宗學并諸路提舉學事  
官屬竝罷內外學悉遵元豐成憲

蕙田案以上宋辟雍學

### 右宋國學

金史選舉志凡養士之地曰國子監始置於天德三年  
後定制詞賦經義生百人小學生百人以宗室及外戚  
皇后大功以上親諸功臣及三品以上官兄弟子孫年  
十五以上者入學不及十五者入小學

大定六年始置太學初養士百六十八人後定五品以上  
官兄弟子孫百五十人曾得府薦及終場人二百五十  
人凡四百人凡試補太學生禮部主之曾得府薦及終  
場舉人皆免試凡學生會課三日作策論一道又三日  
作賦及詩各一篇三月一私試以季月初先試賦閒一

日試策論中選者以上五名申部遇旬休節辰皆有假病則給假省試遠行則給程犯學規者罰不率教者黜凡國子學生三年不能充貢欲就諸局承應者學官試能粗通大小各一經者聽

蕙田案金制國子學之外又有女直國子學以習本國語言

右金國學

元史選舉志太宗六年以馮志常爲國子學總教命侍臣子弟十八人入學

世祖至元七年命侍臣子弟十有一人入學以長者四人從許衡童子七人從王恂

二十四年立國子學而定其制設博士通掌學事分教三齋生員講授經旨是正音訓上嚴教導之術下考肄

習之業復設助教同掌學事而專守一齋正錄申明規矩督習課業凡讀書必先孝經小學論語孟子大學中庸次及詩書禮記周禮春秋易博士助教親授句讀音訓正錄伴讀以次傳習之講說則依所讀之序正錄伴讀亦以次而傳習之次日抽籤令諸生復說其功課對屬詩章經解史評則博士出題生員具藁先呈助教俟博士既定始錄附課簿以憑考校其生員之數定二百人許衡又著諸生入學雜儀及日用節目

成宗大德八年十二月始定國子生蒙古色目漢人三歲各貢一人

十年閏十月國子學定蒙古色目漢人生員二百人三年各貢二人

武宗至大四年閏七月定生員額二百人十二月復立

國子學試貢法蒙古授官六品色目正七品漢人從七品

仁宗延祐二年八月增置生員百人陪堂生二十人用集賢學士趙孟頫禮部尚書元明善等所議國子學貢試之法更定之一曰陞齋等第六齋東西相向下兩齋左曰游藝右曰依仁凡誦書講說小學屬對者隸焉中兩齋左曰據德右曰志道講說四書課肄詩律者隸焉上兩齋左曰時習右曰日新講說易詩書春秋科習明經義等程文者隸焉每季考其所習以次遞陞二曰私試規矩漢人驗日新時習兩齋蒙古色目驗志道據德兩齋本學舉實歷坐齋二周歲以上未嘗犯過者許令充試限實歷坐齋三周歲以上許充貢舉漢人私試孟月試經疑一道仲月試經義一道季月試策問表章詔

誥內科一道蒙古色目人孟仲月各試明經一道季月試策問一道辭理俱優者爲上等準一分理優詞平者爲中等準半分每歲終通計其年積分至八分以上者陞充高等生員以四十名爲額內蒙古色目各十名漢人二十名歲終試貢員不必備惟取實才有分同闕少者以坐齋月日先後多少爲定三曰黜罰科條應私試積分生員其有不事課業及一切違戾規矩者初犯罰一分再犯罰二分三犯除名從學正錄糾舉應已補高等生員其有違戾規矩者初犯殿試一年再犯除名從學正錄糾舉之應在學生員除蒙古色目別議外其餘漢人生員三年不能通一經及不肯勤學者勒令出學

蕙田案明代六堂積分之法蓋取於此然其法實始於宋宋史選舉志嘉定十四年詔歲

五禮通考卷五十一  
終取外舍生校最優者一人升內舍而咸淳  
中外舍生晏泰亨以七分三釐乞理爲第三  
優朝命不許遂申嚴學法今後及八分者方  
許歲校三名卽所謂積分也

泰定三年六月更積分而爲貢舉並依世祖舊制其貢  
試之法從監學所擬大概與前法略同而防閑稍加嚴  
密焉

蕙田案元時國子學之外有蒙古國子學回  
回國子學置助教學正以教公卿百官之子  
弟今俱不載而附見其目於此

右元國學

明史選舉志學校有二曰國學曰府州縣學入國學者  
通謂之監生舉人曰舉監生員曰貢監品官子弟曰廩  
監捐賞曰例監同一貢監也有歲貢有選貢有恩貢有  
納貢同一廩監也有官生有恩生國子學之設自明初  
乙巳始洪武元年令品官子弟及民俊秀通文義者並  
充學生天下既定詔擇府州縣學諸生入國子學又擇  
年少舉人趙惟一等及貢生董景等入學讀書賜以衣  
帳命於諸司先習吏事謂之厯事監生取其中尤英敏  
者李擴等入文華武英堂說書謂之小秀才其才學優  
贍聰明俊偉之士使之博極羣書講明道德經濟之學  
以期大用謂之老秀才初改應天府學爲國子學後改  
建於雞鳴山下旣而改學爲監設祭酒司業及監丞博  
士助教學正學錄典籍掌饌典簿等官分六堂以館諸  
生曰率性修道誠心正義崇志廣業學旁以宿諸生謂  
之號房厚給廩餼歲時賜布帛文綺襲衣巾鞞正旦元

宵諸令節俱賞節錢而其教之之法每旦祭酒司業坐  
堂上屬官自監丞以下首領則典簿以次序立諸生指  
畢質問經史拱立聽命惟朔望給假餘日升堂會饌乃  
會講復講背書輪課以爲常所習自四子本經外兼及  
劉向說苑及律令書數御製大誥每月試經書義各一  
道詔誥表策論判內科二道每日習書二百餘字以二  
王智永歐虞顏柳諸帖爲法每班選一人充齋長督諸  
生工課衣冠步履飲食必嚴飭中節夜必宿監有故而  
出必告本班教官令齋長帥之以白祭酒監丞置集愆  
簿有不遵者書之再三犯者決責四犯者至發遣安置  
司教之官必選者宿宋訥吳顥等由儒士擢祭酒訥尤  
推名師歷科進士多出太學而戊辰任亨泰廷對第一  
太祖召訥褒賞撰題名記立石監門辛未許觀亦如之

進士題名碑由此相繼不絕中都之置國學也自洪武  
八年至二十六年乃革以其師生并入京師永樂元年  
始設北京國子監十八年遷都乃以京師國子監爲南  
京國子監而太學生有南北監之分矣

六堂諸生有積分之法司業二員分爲左右各提調三  
堂凡通四書未通經者居正義崇志廣業一年半以上  
文理條暢者升修道誠心又一年半經史兼通文理俱  
優者乃升率性升至率性乃積分其法孟月試本經義  
一道仲月試論一道詔誥表內科一道季月試經史策  
一道判語二條每試文理俱優者與一分理優文劣者  
與半分紕繆者無分歲內積八分者爲及格與出身不  
及者仍坐堂肄業如有才學超異者奏請上裁  
太祖雖間行科舉而監生與薦舉人才參用者居多故

其時布列中外者太學最盛一再傳之後進士日益重  
薦舉遂廢而舉貢日益輕雖積分歷事不改初法南北  
祭酒陳敬宗李時勉等加意振飭已漸不如其始眾情  
所趨向專在甲科宦途升沈定於謁選之日監生不獲  
上第卽奮自鏃礪不能有成績重之勢然也迨開納粟  
之例則流品漸淆且庶民亦得援生員之例以入監謂  
之民生亦謂之俊秀而監生益輕於是同處太學而舉  
貢得爲府佐貳及州縣正官官恩生得選部院府衛司  
寺小京職尙爲正途而援例監生僅得選州縣佐貳及  
府首領官其授京職者乃光祿寺上林苑之屬其願就  
遠方者則以雲貴廣西及各邊省軍衛有司首領及衛  
學王府教授之缺用而終身爲異途矣  
太祖慮武臣子弟但習武事鮮知問學命大都督府選

入國學其在鳳陽者卽肄業於中都命韓國公李善長  
等考定教官生員高下分列班次曹國公李文忠領監  
事以繩核之嗣後勳臣子弟多人監讀書嘉靖元年令  
公侯伯未經任事三十以下者送監讀書尋令已任者  
亦送監而年少勳戚爭以入學爲榮矣  
舉人入監始於永樂中會試下第輒令翰林院錄其優  
者俾入學以俟後科給以教諭之俸是時會試有副榜  
大抵署教官故令入監者亦食其祿也宣德八年嘗命  
禮部尙書胡濙與大學士楊士奇楊榮選副榜舉人龍  
文等二十四人送監進學翰林院三月一考其文與庶  
吉士同頗示優異後不復另試則取副榜年二十五以  
上者授教職年未及者或依親或入監讀書旣而不拘  
年齒依親入監者皆聽依親者回籍讀書依親肄業也



又有丁憂成昏省親送幼子皆仿依親例限年復班正統中天下教官多缺而舉人厭其卑冷多不願就十三年御史萬節請勅禮部多取副榜以就教職部臣以舉人願依親入監者十之七願就教職者僅十之三但宜各隨所欲卻其請不行至成化十三年御史胡璘言天下教官率多歲貢言行文章不足爲人師範請多取舉人選用而罷貢生勿選部議歲貢如其舊而舉人教官仍許會試自後就教者亦漸多矣嘉靖中南北國學皆空虛議盡發下第舉人入監且立限期以趨之然舉人不願入監者卒不可立強於是生員歲貢之外不得不頻舉選貢以充國學矣

三年爲差二十五年定府學歲二人州學二歲三人縣學歲一人永樂八年定州縣戶不及五里者州歲一人縣間歲一人十九年令歲貢照洪武二十一年例宣德七年復照洪武二十五年例正統六年更定府學歲一人州學三歲二人縣學間歲一人宏治嘉靖間仍定府學歲二人州學二歲三人縣學歲一人遂爲永制後孔顏孟三氏及京學衛學都司土官川雲貴諸遠省其案年充貢之法亦間有增減云歲貢之始必考學行端莊文理優長者以充之其後但取食廩年深者宏治中南京祭酒章懋言洪永間國子生以數千計今在監科貢共止六百餘人歲貢挨次而升衰遲不振者十常八九舉人坐監又每多時差撥不敷教養罕效近年有增貢之舉而所拔亦挨次之人資格所拘英才多滯乞於常

貢外令提學行選貢之法不分廩膳增廣生員通行考選務求學行兼優年富力強累試優等者乃以充貢通計天下之廣約取五六百人以後三五年一行則人材可漸及往年矣乃下部議行之此選貢所由始也選貢多英才入監課試輒居上等撥歷諸司亦有幹局歲貢類老其勢日絀則惟願就教而不願入監嘉靖二十七年祭酒程文德請將廷試歲貢惟畱卽選者於部而其餘盡使入監報可歲貢諸生合疏言家貧親老不願入監禮部復請從其所願而盡使舉人入監又從之舉人入監不能如期南京祭酒潘晟至請設重罰以趣其必赴於是舉人選貢歲貢三者迭爲盛衰而國學之盈虛亦靡有定也神宗時工科郭如心言選貢非祖制其始欲補歲貢之乏其後遂妨歲貢之途請定其選神宗以

爲然至崇禎時又嘗行之恩貢者國家有慶典或登極詔書以當貢者充之而其次卽爲歲貢納貢視例監稍優其實相仿也

廕生入監明初因前代任子之制文官一品至七品皆得廕一子以世其祿後乃漸爲限制在京三品以上方得請廕謂之官生出自特恩者不限官品謂之恩生或卽與職事或送監讀書官生必三品京官成化三年從助教李伸言也時給事中李森不可帝諭責其刻薄第令非歷任年久政績顯著者毋得濫敘而已旣得廕敘由提學官考送部試如貢生例送入監中時內閣呂原子憲由廕監補中書舍人七年辛卯乞應順天鄉試部請從之給事中芮畿不可帝允憲所請不爲例然其後以廕授舍人者俱得應舉矣

恩生之始建文元年錄吳雲子黼爲國子生以雲死節  
雲南也正德十六年定例凡文武官死於忠諫者一子  
入監其後守土官死節亦皆得廕子矣又宏治十八年  
定例東宮侍從官講讀年久輔道有功者沒後子孫乞  
恩禮部奏請上裁正德元年復定其祖父年勞已及三  
年者一子卽授試中書舍人習字未及三年者一子送  
監讀書八年復定東宮侍班官三年者一子入監又神  
宗十二年定例三品日講官雖未考滿一子入監  
例監始於景泰元年以邊事孔棘令天下納粟納馬者  
入監讀書限千人止行四年而罷成化二年南京大饑  
守臣建議欲令官員軍民子孫納粟送監禮部尙書姚  
夔言太學育才之地近者直省起送四十歲生員及納  
草納馬者動以萬計不勝其濫且使天下以貨爲賢士

風日陋帝以爲然爲卻守臣之議然其後或遇歲荒或  
因邊警或大興工作率援往例行之訖不能止

百知錄景泰四年四月右少監武良禮部右侍郎兼  
左春坊左庶子鄒幹等奏臨清縣學生員伍銘等願  
納米八百石乞入監讀書今山東等處正缺糧儲宜  
允其請從之并詔各布政司及直隸府州縣學生員  
能出米八百石於臨清東昌徐州三處賑濟願入監  
讀書者聽

蕙田案例監始於景泰元年顧氏考之蓋未  
詳

監生歷事始於洪武五年建文時定考覈法上中下三  
等上等選用中下等仍歷一年再考上等者依上等用  
中等者不拘品級隨才任用下等者回監讀書永樂五

年選監生三十八人隸翰林院習四夷譯書九年辛卯  
鍾英等五人成進士俱改庶吉士壬辰乙未以後譯書  
中會試者甚多皆改庶吉士以爲常歷事生成名其蒙  
恩遇如此仁宗初政中軍都督府奏監生七人隸事勤  
慎請注選授官帝不許仍令入學由科舉以進他歷事  
者多不願還監於是通政司引奏六科辦事監生二十  
人滿日例應還監仍願就科辦事帝復召二十人者諭  
令進學蓋是時六科給事中多缺諸生覬得之帝察知  
其意故不授官也宣宗以教官多缺選用監生三百八  
十人而程富等以都御史顧佐之薦使於各道歷政三  
月選擇任之所謂試御史也初令監生由廣業升率性  
始得積分出身天順以前在監十餘年然後撥歷諸司  
歷事三月仍留一年送禮部銓選其兵部清黃及隨御

史出巡者則以三年爲率其後以監生積滯者多頻減  
撥歷歲月以疏通之每歲揀選優者輒與撥歷有未及  
一年者宏治八年監生在監者少而吏部聽選至萬餘  
人有十餘年不得官者祭酒林瀚以坐班人少不敷撥  
歷請開科貢禮部尙書倪岳覆奏科舉已有定額不可  
再增惟請增歲貢人數而定諸司歷事必須日月滿後  
方與更替使諸生坐監稍久選人亦無壅滯及至嘉靖  
十年監生在監者不及四百人諸司歷事歲額以千計  
禮部尙書李時引岳前議言岳權宜二法一增歲額以  
足坐班生徒一議差歷以久坐班歲月於是府州縣學  
以一歲二貢二歲三貢一歲一貢爲差行之四歲而止  
其諸司歷事三月考勤之後仍歷一年其餘寫本一年  
清黃寫誥清軍清匠三年以至出巡等項俱如舊例日

月今國學缺人視宏治閒更甚請將前件事例參酌舉行並從之獨不增貢額未幾復以祭酒許誥提學御史胡時善之請詔增貢額如岳時前議隆萬以後學校積弛一切循故事而已崇禎二年從司業倪嘉善言復行積分法八年從祭酒倪元璐言以貢選為正流援納為閏流貢選不限撥期以積分歲滿為率援納則依原定撥歷為率而歷事不分正雜惟以考定等第為歷期多寡諸司教之政事勿與猥雜差遣滿日校其勤惰開報吏部不率者回監教習時監規頽廢已久不能振作也

### 右明國學

漢書循吏傳文翁為蜀郡守修起學官於成都市中招下縣子弟以為學官弟子為除更繇高者以補郡縣吏次為孝弟力田常選學官童子使在便坐受事每出行

縣益從學官諸生明經飭行者與俱使傳教令出入閭

閭縣邑吏民見而榮之數年爭欲為學官弟子富人至

出錢以求之繇是大化蜀地學於京師者比齊魯焉至

武帝時乃令天下郡國皆立學校官自文翁為之始云

師古曰文翁學堂今在益州城內

儒林傳元帝時郡國置五經百石卒史

平帝紀元始三年立學官郡國曰學縣道邑侯國曰校

校學置經師一人鄉曰庠聚曰序序庠置孝經師一人

何武傳武為刺史行部必先即學宮見諸生試其誦論

問以得失

後漢書寇恂傳建武三年為汝南太守修鄉校教生徒

聘能為左氏春秋者親受學焉

循吏傳衛颯為桂陽太守下車修庠序之教

任延為武威太守造立校官自掾吏子孫皆令詣學受業復其徭役章句既通悉顯拔榮進之郡遂有儒雅之士

李忠傳建武六年遷丹陽太守忠以丹陽越俗不好學乃為起學校習禮容春秋鄉飲選用明經郡中向慕之明帝本紀永平十年幸南陽召校官弟子作雅樂奏鹿鳴帝自御塤箎和之以娛嘉賓

宋均傳調辰陽長為立學校

循吏傳秦彭建初元年遷山陽太守崇好儒雅修明庠序每春秋饗射輒修升降揖讓之儀

鮑永傳昱子德為南陽太守時郡學久廢德乃修起橫舍備俎豆黼冕行禮奏樂又尊饗國老宴會諸儒百姓觀者莫不勸服

魯恭傳弟丕元和元年徵再遷拜趙相趙王商嘗欲避疾便時移住學官學官學舍也丕奏曰學官傳五帝之道修先

王禮樂教化之處王欲廢塞以廣游讌事不可聽詔從不言

魏志高柔傳明帝即位高柔上疏曰昔漢末陵遲禮樂崩壞太祖初興愍其如此在於撥亂之際並使郡縣立教學之官高祖即位遂闡其業興復辟雍州立課試於是天下之士復聞庠序之教親俎豆之禮焉

晉書虞溥傳太康時為鄱陽內史大修庠序廣招學徒移告屬縣具為條制於是至者七百餘人溥乃作誥以獎諭之曰文學諸生皆冠帶之流年盛志美始涉學庭講修典訓此大成之業立德之基也夫聖人之道淡而寡味故始學者不好也及至期月所觀彌博所習彌多

日聞所不聞日見所不見然後心開意朗敬業樂羣忽  
然不覺大化之陶已至道之入神也故學之染人甚於  
丹青丹青吾見其久而渝矣未見久學而渝者也夫工  
人之染先修其質後事其色質修色積而染工畢矣學  
亦有質孝弟忠信是也君子內正其心外修其行行有  
餘力則以學文文質彬彬然後爲學夫學者不患才不  
及而患志不立故曰希驥之馬亦驥之乘希顏之徒亦  
顏之倫又曰剡而舍之朽木不知剡而不舍金石可虧  
斯非其效乎時祭酒求更起屋行禮薄曰君子行禮無  
常處也故孔子射於矍相之圃而行禮於大樹之下況  
今學庭庠序高堂顯敞乎

宋書禮志晉穆帝永和中征西將軍庾亮在武昌開置  
學官教曰洙泗邈遠風雅彌替後生放任不復憲章典

謨宜處分安學校處所籌量起立講舍參佐大將子弟  
悉令入學吾家子弟亦令受業四府博學識義通涉文  
學經綸者建儒林祭酒使班同三署厚其供給皆妙選  
邦彥必有其宜者以充此舉近臨川臨賀二郡並求修  
復學校若非束脩之流禮教所不及而欲階緣免役者  
不得爲生明爲條制令法清而人貴又繕造禮器俎豆  
之屬

梁書儒林傳武帝選學生遣就會稽雲門山受業於廬  
江何允分遣博士祭酒到州郡立學

魏書儒林傳顯祖天安初立鄉學郡置博士二人助教  
二人學生六十人後詔大郡立博士二人助教四人學  
生一百人次郡立博士二人助教四人學生八十人中  
郡立博士一人助教二人學生六十人下郡立博士一

人助教一人學生四十人郡縣學始乎此矣  
北齊書儒林傳齊制諸郡並立學置博士助教授經學  
生俱被差逼充員士流及豪富之家皆不從調備員既  
非所好墳籍固不關懷又多被州郡官人驅使縱有游  
惰亦不檢察皆由上非所好之所致也諸郡俱得察孝  
廉其博士助教及游學之徒通經者推擇充舉射策十  
條通八以上聽九品出身其尤異者亦蒙抽擢  
隋書高祖本紀仁壽元年詔太學四門及州縣學並廢  
唐書選舉志唐制京都學生八十人大都督中都督府  
上州各六十人下都督府中州各五十人下州四十人  
京縣五十人上縣四十人中縣中下縣各三十五人下  
縣二十人州縣學生州縣長官補長史主焉每歲仲冬  
州縣館監舉其成者送至尚書省

文獻通考武德七年詔諸州縣及鄉並令置學有明一經以上者有司試冊加階

唐書選舉志元宗開元中敕州縣學生年二十五以下  
八品九品子若庶人二十一已下通一經及未通經而  
聰悟有文詞史學者入四門學為俊士即諸州貢舉省  
試不第願入學者亦聽

文獻通考開元二十六年正月十九日敕古者鄉有序  
黨有塾將以宏長儒教誘進學徒化人成俗率由於是  
其天下州縣每鄉之內里別各置一學仍擇師資令其  
教授

貞元三年正月右補闕宇文炫上言諸京畿諸縣鄉村  
廢寺並為縣學併上制書事二十餘件疏奏不報  
後唐天成三年宰臣兼判國子祭酒崔協奏請頒下諸



道州府各置官學如有鄉黨備諸文行可舉者錄其事  
實申監司方與解送但一身就業不得影庇門戶

宋太宗皇帝太平興國二年知江州周述言廬山白鹿  
洞學徒常數千百人乞賜九經肄習詔國子監給本仍  
傳送之先時南唐升元中白鹿洞建學館以李道為洞  
主掌其教授

又賜石鼓書院敕額書院唐元和間衡州李寬所建國  
初賜額

真宗大中祥符二年應天府民曹誠即楚邱戚同文舊  
居造舍百五十間聚書數千卷博延生徒講習甚盛府  
奏其事詔賜額曰應天府書院命奉禮郎戚舜賓主之  
仍令本府幕職官提舉以誠為府助教  
八年賜潭州嶽麓書院額始開寶中郡守朱洞首度基

創字以待四方學者李允則來為州請於朝乞以書藏  
方是時山長周式以行義著八年召見便殿拜國子學  
主簿使歸教授詔賜書院名增賜中祕書

馬氏端臨曰右宋初四書院建置之本末如此此外  
則又有西京嵩陽書院賜額於至道二年江甯府茅  
山書院賜田於天聖二年嵩陽茅山後來無聞獨四  
書院之名著是時未有州縣之學先有鄉黨之學蓋  
州縣之學有司奉詔旨所建也故或作或輟不免具  
文鄉黨之學賢士大夫留意斯文者所建也故前規  
後隨皆務興起後來所至書院尤多而其田土之錫  
教養之規往往過於州縣學蓋皆欲倣四書院云

蕙田案書院之設於古未聞宋初始有白鹿  
洞石鼓應天嶽麓四書院有司以上聞輒為

賜額賜書以優異之逮於南宋之季及元代諸路所立書院尤多固理學昌明之效而太宗真宗風厲儒術以開一代文明之治其功顧不多哉

觀承案州縣之學國家所建也書院之設乃起於士大夫培植人才之意文翁時官未立學特修起學官於成都市中雖無書院之名要即書院之義至宋時四大書院而理學昌明真儒輩出爲極盛矣元明以來亦相延勿替是固當與學校相輔而行者也又周禮以本俗安萬民四曰聯師儒疏謂致仕賢者使教鄉閭子弟今書院延師猶存此義

宋史選舉志仁宗卽位初命藩輔皆得立學慶曆四年

詔曰儒者通天地人之理明古今治亂之原可謂博矣然學者不得聘其說而有司務先聲病章句以拘牽之則吾豪雋奇偉之士何以奮焉士以純明樸茂之美而無敦學養成之法使與不肖並進則夫懿德敏行何以見焉此取士之甚敝而學者自以爲患夫遇人以薄者不可責其厚也今朕建學興善以尊子大夫之行更制革敝以盡學者之才有司其務嚴訓導精察舉以稱朕意學者其進德修業無失其時其令州若縣皆立學本道使者選部屬官爲教授員不足取於鄉里宿學有道業者由是州郡奉詔興學而士有所勸矣

文獻通考安定先生胡瑗自慶曆中教學於蘇湖間二十餘年束脩弟子前後以數千計是時方尙辭賦獨湖學以經義及時務學中故有經義齋治事齋經義齋者

擇疏通有器局者居之治事齋者人各治一事又兼一事如邊防水利之類故天下謂湖學多秀彥其出而策仕往往取高第及爲政多適於世用若老於吏事者由講習有素也慶歷四年詔州縣皆立學於是建大學於京師而有司請下湖州取先生之法以爲大學至今著爲令

神宗熙甯四年詔置京東西河東北陝西五路學以陸佃等爲諸州學官仍令中書采訪逐路有經術行誼者各三五人雖未仕亦給簿尉俸使權教授他路州軍命近日選薦京朝官有學行可爲人師者堂除逐路官令兼所任州教授州給田十頃爲學糧仍置小學教授八年秋詔諸州學官先赴學士院試大義五道取優通者選差

元豐元年詔諸路州府學官共五十三員京東路兗徐曹鄆青密州應天府各一員京西路西京國子監許陳襄鄧州各一員河北路北京國子監定相滄衛棣瀛州真定府各一員陝西路陝華耀邠秦燕州永興軍鳳翔河中府各一員河東路潞晉代州太原府各一員淮南路揚州亳州各一員兩浙路杭越蘇三州各一員江南東路饒州江甯府各一員江南西路洪州吉州各一員荆湖南路潭州一員荆湖北路江陵府一員福建路建州一員成都府路眉州成都府各一員梓州路梓州普州各一員利州路利州一員夔州路夔州一員廣南東路廣州一員廣南西路桂州一員

馬氏端臨曰是時大興學校而天下之有教授者只五十三員蓋重師儒之官不肯輕授濫設故也觀其

所用者既是有出身人然又必試中而後授則與入館閣翰苑者同科其遴選至矣哲宗元祐初齊廬宿常虔穎同懷澶河陽等州始相繼置教授三舍法行而員額愈多至大觀時吉州建州皆以養士數多置教授三員宣和時罷州縣學三舍法始令諸州教授若係未行三舍已前置者依舊餘並減罷如贍學田產房廊等係行三舍後添給者亦復拘收云

哲宗元祐元年詔近臣擇經明行修堪內外學官者人舉二員遂罷試補法

二年中丞胡宗愈言學者初登科遂顯師席非是詔內外學官經任年至三十方得在選 四年以舉薦頗眾詔須命舉乃得奏上

紹聖元年三省立格侍從臺諫國子長貳歲舉堪任諸州學官一員須常中進士或制科年及三十者若制科進士第在上五人禮部奏名在上三人府監廣文館第一人或從太學上舍得第即皆不試而用餘並召附吏部春秋試凡試兩經大義各一道以通經善作文爲合格已經舉試中書籍其姓名俟有關則選授焉於是內外見學官非制科進士出身及由上舍生入官者並罷時學官已立試法潭廣已下十一州教授本付吏部擬注者令三省選差

宋史選舉志元符二年初令諸州行三舍法考選升補悉如太學州許補上舍一人內舍二人歲貢之其上舍附太學外舍試中補內舍生三試不升舍遣還其州其內舍免試至則補爲外舍生諸路選監司一員提舉學校守貳董幹其事遇補試上內舍生選有出身官一人

同教授考選須彌封臚錄

崇甯元年宰臣請天下州縣並置學州置教授二員縣亦置小學縣學生選考升諸州學州學生每三年貢太學至則附試別立號考分三等入上等補上舍入中等補下等上舍入下等補內舍餘居外舍諸州軍解額各以三分之一充貢士開封府留五十五額解士人之不入學者餘盡均給諸州以爲貢額外官子弟親戚許入學一年給牒至太學用國子生額解試州給常平或係省田宅免養士費縣用地利所出及非係省錢文獻通考崇甯三年令州縣學用三舍法陞太學罷科舉每上舍生升舍已其秋卽貢入辟雍長吏集闕郡官提舉司官卽本所燕設以禮津遣限歲終悉集闕下選士入貢其自今年始如有孝弟睦嫻任恤忠和若行能

尤異爲鄉里所推縣上之州免試入學教授知通詢審無謬卽保任入貢仍其實以間不實者坐罪有差

蕙田案孝弟睦嫻任恤忠和謂之八行科

三年臣僚言比者試文有以聖經之言輒爲時忌而避之者如曰大哉堯之爲君以爲哉與災同制治於未亂安不忘危吉凶悔吝生乎動則以爲危亂凶悔皆當避不諱之朝豈宜有此詔禁之

四年鮑耀卿言今州縣學考試未校文字精弱先問時忌有無苟語涉時忌雖甚工不敢取時忌如曰休兵以息民節用以豐財罷不急之役清入仕之流諸如此語熙豐紹聖閒試者其用不忌今悉緝之宜禁止詔可

馬氏端臨曰熙甯之立學校養生徒上自天庠下至郡縣其大意不過欲使之習誦新經附和新法耳紹

聖宗觀而後羣儉用事醜正益甚遂立元祐學術之禁又令郡縣置自訟齋以拘誹謗時政之人士子志於進取故過有拘忌蓋言休兵節用則恐類元祐之學言災凶危亂則恐涉誹謗之語所謂轉喉觸諱者也則惟有迎逢諂佞而已

七年給事中毛友言比守郡見訴役者言富家子弟初不知書第損數百緡錢求人試補入學遂免身役比其歲升不中更數年而始除籍則其幸免已多矣請初試補入縣學人並簾試以別偽冒從之

宣和三年罷天下州縣學三舍法惟大學用之

高宗建炎初復教官試紹興中議者謂欲爲人師而自納所業于有司以幸中度乃詔罷其試而教授自朝廷選差已而復之凡有出身許應先具經義詩試各二首

赴禮部乃下省闈分兩場試之而取其文理優長者不限其數初任爲諸州教官繇是爲兩學之選十五年國子監丞文浩言師儒之官與諸生難疑答問於羣經宜無所不通請自今並於六經中臨期取二經各出兩題無拘義式以貫穿該贍爲合格詔行焉其後四川制置司遇類省試年亦放禮部附試自嘉泰元年始

紹興三年詔淮西路州縣教授並行減罷令逐州有出身官兼

十八年江西轉運賈直清奏諸立縣學於縣官內選有出身人兼領教導尋下國子監參酌措置欲比附舊法縣學委知通於令佐內選有出身官一員兼領教導職事及諸州軍如未差教授處卽令本路提舉司於本州有出身官選差一員兼領若州縣官俱無出身只令本

學長諭專主教導卻令知州縣令覺察點檢從之  
二十一年大理寺主簿丁仲京奏贍學田土多爲勢家  
侵佃望令提舉學事官覺察上謂大臣曰旣不度僧常  
住多有絕產其併撥以贍學旣而戶部請令提舉司置  
籍拘管其無敕額庵院一體行

朱子崇安縣學田記子惟三代盛時自家以達於天  
子諸侯之國莫不有學而自天子之元子以至於士  
庶人之子莫不入焉則其土之廩於學官者宜數十  
倍於今日而考之禮典未有言其費出之所自者豈  
當時爲士者之家各已受田而其入學也有時故得  
以自食其食而不仰給於縣官也歟至漢元成閒乃  
謂孔子布衣養徒三千而增學官弟子至不復限以  
員數其後遂以用度不足無以給之而至於罷夫謂

三千人者聚食於孔子之家則已妄矣然養士之需  
至於以天下之力奉之而不足則亦豈可不謂難哉  
蓋自周衰田不井授人無常產而爲士者尤厄於貧  
反不得與爲農工商者齒上之人乃欲聚而教之則  
彼又安能終歲裹飯而學於我是以其費雖多而或  
取之經常之外勢固有不得已也

宋史選舉志光宗紹熙三年禮部侍郎倪思請復混補  
法命兩省臺諫雜議可否於是吏部尙書趙汝愚等合  
奏曰國家恢儒右文京師郡縣皆有學慶厯以後文物  
彬彬中興以來建大學於行都行貢舉於諸郡然奔競  
之風勝而忠信之俗微亦惟榮辱升沈不由學校德行  
道藝取決糊名工雕篆之文無進修之志視庠序如傳  
舍目師儒如路人季考月書盡成文具今請重教官之

選假守貳之權倣舍法以育材因大比以取士考終場之數定所貢之員期以次年試于大學其諸州教養課式升貢之法下有司條上思議遂寢

金史選舉志府學大定十六年置凡十七處共千人以嘗與廷試及宗室皇家袒免以上親并得解舉人為之後增州學遂加以五品以上官曾任隨朝六品官之兄弟子孫餘官之兄弟子孫經府薦者同境內舉人試補三之一凡試補學生以提舉學校學官主之

大定二十九年戶部尚書鄧儼等議計州府戶口增養士之數於大定舊制京府十七處千人之外置節鎮防禦刺史州學六十處增養千人各設教授一員選五舉終場或進士年五十以上者為之府學二十有四學生九百五人節鎮學三十九共六百一十五人防禦州學

二十一共二百三十五人凡千八百人

元史選舉志世祖中統二年始命置諸路學校官凡諸生進修者嚴加訓誨務使成材以備選用

至元十九年四月命雲南諸路皆建學

二十三年二月詔江南學校舊有學田復給之以養士二十四年立國子學於國城之東迺以南城國子學為大都路學自提舉以下設官有差

二十八年令江南諸路學及各縣學內設立小學選老成之士教之其他先儒過化之地名賢經行之所與好事之家出錢粟贍學者並立為書院凡師儒之命於朝廷者曰教授路府上中州置之命于禮部及行省及宣慰司者曰學正山長學錄教諭路州縣及書院置之路設教授學正學錄各一員散府上中州設教授一員下



州設學正一員縣設教諭一員書院設山長一員凡路

府州書院設直學以掌錢穀  
明史選舉志郡縣之學洪武二年太祖諭中書省臣曰  
朕惟治國以教化爲先教化以學校爲本京師雖有太  
學而天下學校未興宜令郡縣皆立學校延師儒授生  
徒講論聖道使人日漸月化以復先王之舊於是大建  
學校府設教授州設學正縣設教諭各一俱設訓導府  
四州三縣二生員之數府學四十人州縣以次減十師  
生月廩食米人六斗有司給以魚肉學官月俸有差生  
員專治一經以禮樂射御書數設科分教務求實才頑  
不率者黜之十五年頒學規於國子監又頒禁例十二  
條於天下鐫立卧碑置明倫堂之左其不遵者以違制  
論

生員雖定數於國初未幾卽命增廣不拘額數宣德中  
定增廣之額在京府學六十人在外府學四十人州縣  
以次減十成化中定衛學之例四衛以上軍生八十人  
三衛以上軍生六十人二衛一衛軍生四十人有司儒  
學軍生二十人土官子弟許入附近儒學無定額增廣  
旣多於是初設食廩者謂之廩膳生員增廣者謂之增  
廣生員及其旣久人才愈多又於額外增取附於諸生  
之末謂之附學生員凡初入學者止謂之附學而廩膳  
增廣以歲科兩試等第高者補充之非廩生久次者不  
得充歲貢也士子未入學者通謂童生當大比之年閒  
收一二異敏三場並通者俾與諸生一體入場謂之充  
場儒士中式卽爲舉人不中式仍候提學官歲試合格  
乃準入學提學官在任三歲兩試諸生先以六等試諸

生優劣謂之歲考一等前列者視廩膳生有缺依次充補其次補增廣生一二等皆給賞三等如常四等撻責五等則廩增遞降一等附生降為青衣六等黜革繼取一二等為科舉生員俾應鄉試謂之科考其充補廩增給賞悉如歲試其等第仍分為六而大抵多置三等三等不得應鄉試撻黜者僅百一亦可絕無也生儒應試每舉人一名以科舉三十名為率舉人屢廣額科舉之數亦日增及求舉者益眾又往往於定額之外加取以收士心凡督學者類然嘉靖十年常下沙汰生員之令御史楊宜爭之而止神宗時張居正當國遂核減天下生員督學官奉行太過童生人學有一州縣僅錄一人者其科舉減殺可推而知也

元年始特置提學官專使提督學政南北直隸俱御史各省參用副使僉事景泰元年罷提學官天順六年復設各賜敕諭十六條俾奉行之直省既設提學有所轄太廣及地最僻遠歲巡所不能及者乃酌其宜口外及各都司衛所土官以屬分巡道員直隸廬鳳淮揚滁徐和以屬江北巡按湖廣衡永郴以屬湖南道辰靖以屬辰沅道廣東瓊州以屬海南道甘肅衛所以屬巡按御史亦皆專敕行事神宗四十一年南直隸分上下江湖廣分南北始各增提學一員提學之職專督學校不理刑名所受詞訟重者送按察司輕者發有司直隸則轉送巡按御史督撫巡按及布按二司亦不許侵提學職事也

明初優禮師儒教官擢給事御史諸生歲貢者易得美

官然錯束亦甚謹太祖時教官考滿兼覈其歲貢生員之數後以歲貢為學校常例二十六年定學官考課法專以科舉為殿最九年任滿核其中式舉人府九人州六人縣三人者為最其教官又考通經即與陞遷舉人少者為平等即考通經亦不遷舉人至少及全無者為殿又考不通經則黜降其待教官之嚴如此生員入學十年學無所成者及有大過者俱送部充吏追奪廩糧至正統十四年申明其制而稍更之受贓盜冒籍宿娼居喪娶妻妾所犯事理重者直隸發充國子監膳夫各省發充附近儒學膳夫齋夫滿日為民俱追廩米犯輕充吏者不追廩米其待諸生之嚴又如此然其後教官之黜降生員之充發皆廢格不行即卧碑亦具文矣諸生上者中式次者廩生年久充貢或選拔為貢生其

右歷代郡縣學

累試不第年踰五十願告退聞者給與冠帶仍復其身其後有納粟馬捐監之例則諸生又有援例而出學者矣提學官歲試校文之外令教官舉諸生行優劣者二人賞黜之以為勸懲此其大較也

五禮通考卷第一百七十一

五禮通考卷第一百七十二

內廷供奉禮部侍郎金匱秦蕙田編輯

翰林院編修嘉慶錢大昕

李天保總督魏象樞桐城方觀承同訂

直隸按察司副使元和宋崇完

參校

嘉禮四十五

學禮

禮記文王世子天子視學大昕鼓徵所以警眾也眾至

然後天子至

注大昕早味爽擊鼓以召眾警猶起也周禮凡用樂大胥以鼓徵學士疏視學謂仲春合舞季春合樂仲秋合聲之時也

月合仲春之月上丁命樂正習舞釋菜天子乃帥三公

九卿諸侯大夫親往視之

季春之月擇吉日大合樂天子乃帥三公九卿諸侯大

夫親往視之

注大合樂者所以助陽達物風化天下也其禮亡

蕙田案大司樂掌成均之法以樂德樂語樂

舞教國子故大合樂必於太學而天子親往  
視之以觀禮焉大雅云於論鼓鐘於樂辟靡  
此合樂於學宮之證也周禮大胥職云春入  
學舍菜合舞秋頒學合聲說者以頒學合聲  
在仲秋之月天子亦視學於養老而月令無  
之文不具也

學記未卜禘不視學游其志也

注禘大祭也天子諸侯既祭乃  
視學考校以游暇學者之志意

陳氏禮書古者喪畢則禘未卜禘而視學非所以示孝道而不足以游學者之  
志也春秋傳稱晉人曰以寡君之未禘祀未禘祀猶不可務外事况視學乎

王制將出學小胥大胥小樂正簡不帥教者以告于大  
樂正大樂正以告于王王命三公九卿大夫元士皆入  
學不變王親視學

陳氏禮書天子視學四養老也簡不帥教也出征受  
成也以訊馘告也養老必于仲春季春仲秋而簡不

帥教出征受成以訊馘告者無常時雖無常時其入  
學也亦必養老焉天子將視學以鼓徵眾序立以齒  
及天子至命有司行事祭先師先聖于西學有司卒  
事反命乃適東序養老焉此視學之大略也

蕙田案文王世子記視學警眾之節月令記  
視學合樂之事學記記視學考校之法王制  
記視學簡不帥教之事其養老受成訊馘諸  
儀俱別見

詩魯頌泮水魯侯戾止在泮飲酒

陳氏禮書諸侯視學之禮蓋有同于天子詩云魯侯  
戾止在泮飲酒既飲旨酒永錫難老此養老也在泮  
獻囚此以訊馘告也

右天子諸侯視學

後漢書世祖本紀建武五年冬十月初起太學車駕幸太學賜博士弟子各有差

桓榮傳建武十九年拜榮為博士車駕幸太學會諸博士論難于前榮被服儒衣溫恭有蘊藉辯明經義每以禮讓相厭不以辭長勝人儒者莫之及特加賞賜又詔諸生雅吹擊磬盡日乃罷

明帝本紀永平二年春三月臨辟雍冬十月壬子幸辟雍

儒林傳中元元年初建三雍明帝卽位親行其禮天子始冠通天衣日月備法物之駕盛清道之儀帝正坐自講諸儒執經問難于前冠帶搢紳之人園橋門而觀聽者蓋億萬計

和帝本紀永元十四年春三月戊辰臨辟雍

順帝本紀陽嘉元年春三月庚寅帝幸辟雍

魏志高貴鄉公本紀甘露元年四月丙辰帝幸太學

二年五月辛未帝幸辟雍會命羣臣賦詩

晉書武帝本紀泰始六年冬十一月幸辟雍賜太常博士學生帛牛酒各有差

宋書文帝本紀元嘉二十三年九月己卯車駕幸國子學策試諸生問答凡五十九人冬十月詔曰庠序興立累載胄子肄業有成近親策試觀濟濟之美緬想洙泗永懷在昔諸生問答多可採覽教授之官竝宜沾賚賜帛各有差

南齊書武帝本紀永明四年三月辛亥國子講孝經車駕幸學賜國子祭酒博士助教絹各有差

梁書武帝本紀天監九年三月己丑車駕幸國子學親

臨講肆賜國子祭酒以下帛各有差 十二月癸未與  
駕幸國子學策試胄子賜訓授之司各有差  
魏書孝文帝本紀太和十六年四月甲寅幸皇宗學親  
問博士經義 十七年九月壬申幸太學觀石經  
隋書禮儀志後齊將講于天子先定經于孔父廟置執  
經一人侍講二人執讀一人摘句二人錄義六人奉經  
二人講之且皇帝服通天冠元紗袍乘象輅至學坐廟  
堂上講訖還便殿改服絳紗袍乘象輅還宮  
周書武帝本紀保定三年夏四月戊午幸太學  
宣帝本紀大象二年二月丁巳帝幸露門學  
隋書高祖本紀開皇十年十一月辛卯幸國子學頒賜各  
有差

舊唐書禮儀志武德七年二月丁酉幸國子學引道士

沙門有學業者與博士雜相駁難久之

唐書陸元朗傳補太學博士高祖已釋奠召博士徐文  
遠浮屠慧乘道士劉進喜各講經德明隨方立義徧析  
其要帝大喜曰三人者誠辯然德明一舉輒蔽可謂賢  
矣

蕙田案唐祖舉幸學之典乃以沙門道士與  
博士相論難去重道之意遠矣

舊唐書禮儀志貞觀十四年三月丁丑太宗幸國子學  
親觀釋奠祭酒孔穎達講孝經

開元禮皇帝皇太子視學 前一日所司灑埽學堂之  
內外尚舍設大次于學堂之後守宮設皇太子次于大  
次之東皆隨地之宜竝如常儀尚舍設御位學堂上北  
壁下當中南向監司設講榻于御座之西南向設執讀

座于前楹間當講榻北向尚舍又設皇太子座于御座  
東南西向設文官三品以上座于皇太子之南少退重  
行西面北上設武官三品以上座于講榻西南當文官  
重行東面北上設侍講座于執讀西北武官之前東面  
北上其執如意者一人立于侍講之南東面設論議座  
于講榻之前西階下典儀設版位皇太子于東階東南  
西面執經于西階西南東面文官三品以上于皇太子  
東南重行西面北上武官三品以上于執經西南侍講  
執讀執如意等于執經之後重行東面北上學生分于  
文武官之後皆重行北上設典儀位于東階之西贊者  
二人在南差退俱西面  
出宮 前出宮三日本司宣攝內外各供其職其日應  
從駕文武官依時刻集朝堂諸衛陳設仗衛侍中版奏

外辦皇帝乘馬文武侍從並如常行幸之儀駕將至祭  
酒率監官學官學生等奉迎于路左學生青衿服駕至  
大次門外降入如常

視學 皇帝既入大次執經侍講執讀執如意等及學  
官各服公服典儀率贊者先入就位謁者贊引引文武  
三品以上及執經以下學生等入就堂下位皇太子立  
于學堂門外之東西向如常侍中版奏外辦皇帝出大  
次升自北階即御座南向坐侍臣及近侍量人從升典  
儀一人升就東階上西面立舍人引皇太子就位立諸  
衛率庶子等量人從入立于皇太子東南西向北上奉  
禮曰再拜贊者承傳皇太子以下在位者皆再拜侍中  
跪奏稱請敕皇太子及公王等升坐又侍中稱制曰可  
侍中詣東階上西面稱敕皇太子及公王等升殿上典



儀承傳階下贊者又承傳皇太子以下應坐者皆再拜  
訖通事舍人引皇太子及羣官坐者各升座訖其公服  
者脫履于階下及降納皆如常執讀讀所講經執經釋  
義訖侍講者執如意就論議座以次論難侍中跪奏禮  
畢羣官皆起通事舍人各降堂下位若有敕賜會則侍  
中前承制降詣堂下宣敕及太官下食案等竝如常儀  
皇帝降座還大次侍衛如常儀羣官以下會訖皆出執  
經以下改服常服學生仍青衿服  
車駕還宮 皇帝既還大次侍中量時刻版奏外辦皇  
帝出次文武官陪從還宮如來儀初駕出國子祭酒帥  
監官學官學生等奉辭于路左如常式  
王海周顯德二年初建國子監國初又增置學舍太祖  
親撰先聖及亞聖贊十哲以下分命宰臣兩制撰太祖

三幸國子監閱土木之功

蕙田案王海據祖宗故事謂藝祖建隆元年  
正月首幸國學次月又幸范百祿以為祖宗  
隆儒師古躬化天下之意但續通鑑長編會  
要日歷諸書皆不載此事考本紀兩幸國學  
在建隆三年編纂故事者誤移之元年耳

宋史太祖本紀建隆二年十一月己巳幸國子監 三

年春正月癸未幸國子監二月丙辰復幸國子監

乾德元年夏四月丁亥幸國子監

太宗本紀太平興國四年二月壬子幸國子監

文獻通考端拱元年八月幸國子監謁文宣王畢升輦  
將出西門顧見講坐左右言學官李覺方聚徒講書即  
召覺令對御講說覺曰陛下六飛在御臣何敢輒陞高

座帝為降輦令有司張帘幕設別坐詔覺講易之泰卦  
從臣皆列坐覺因述天地感通君臣相應之旨帝甚悅  
特賜帛百匹

玉海淳化五年十一月上幸國子監賜直講孫奭五品  
服因幸武成王廟徧閱塑像復幸太學賜羣臣坐時侍  
講李至執經講堯典一篇未畢令奭講說命三篇奭曰  
尚書主言治世之道說命最備文王得太公高宗得傅  
說皆賢相也至事不師古以克永世匪奭攸聞上曰誠  
哉是言因歎曰何高宗之時而有賢相如此飲從官酒  
三行賜奭帛三十匹

咸平二年七月甲辰幸國子監謁先聖因覽壁畫三禮  
圖移幸武成王廟復至國學命學官崔偓佺講大禹謨  
賜緋祭酒邢昺以下銀綵還幸崇文院閱羣書命從臣

縱覽登祕閣觀太學聖製墨迹惻愴久之祕丞劉錯獻  
幸太學頌

景德二年夏五月戊申幸國子監

天聖二年八月己卯幸國子監謁文宣王召從臣升講  
堂令直講馬龜符說論語一篇賜三品服已而觀七十  
二賢讚述閱東序三禮圖因問侍講馮元三代制度元  
引經以對

宋史仁宗本紀慶曆四年夏五月壬申幸國子監謁孔  
子賜直講孫復五品服

哲宗本紀元祐六年冬十月庚午幸國子監賜祭酒豐  
稷三品服監學官賜帛有差

禮志哲宗始視學遂幸國子監御敦化堂召從官賜坐  
禮部太常寺本監官承事郎以上侍立承務郎以下三

學生坐于東西廡侍講吳安詩執經祭酒豐稷講尚書無逸終篇復命宰臣以下至三學生坐賜茶豐稷賜三品服本監官學官等賜帛有差

徽宗本紀崇甯三年十一月甲戌幸太學官論定之士十六人遂幸辟雍賜國子司業吳紉蔣靜四品服學生推恩有差

禮志徽宗幸太學遂幸辟雍所司預設次于敦化堂後又于堂上稍北當中兩間設次南向設御座又設從官及講筵講書執經官并太學官坐御座之南東西重行異位太學生坐于兩廡相向竝北上宰官以下從官之次設于中門外皇帝酌獻文宣王畢幸太學降輦入次簾垂更衣禮直官通事舍人引講官與侍立官入就堂下皆繫鞵講書執經學生各立堂下東西相向俟報班

齊皇帝升座班首奏萬福在位者皆應喏訖閣門使承旨臨階宣升堂通事舍人喝拜應在位者再拜訖分左右升堂各就位少立起居郎舍人分左右侍立禮直官通事舍人引講書及執經官就北向位班首奏萬福閣門使宣升堂舍人唱再拜訖分東西升堂立于御座右右講書官在西東向執經官在東西向學生就北向位舍人喝拜在位者皆再拜立于東西兩廡內侍進書案以經授執經官稍前進于案上舍人喝拜就坐宰臣以下竝堂上坐如閣門所進坐位圖講書畢通事舍人曰可起羣臣皆起降階立執經官降講書官于御座前致辭訖亦降舍人喝拜如有宣答卽再喝拜閣門宣坐賜茶舍人喝拜訖宰臣以下升堂各立于位後學生各就北向位舍人喝拜在位者俱拜訖各分東西廡以北爲

上下舍人喝就坐上下皆就坐賜茶畢禮直官通事舍人引堂上官降階就位舍人喝拜在位者俱拜訖禮直官引之以次出學生就位舍人喝拜學生俱再拜退  
玉海宣和四年三月幸太學命祭酒韋壽隆講書無逸司業權邦彥講詩下武學官遷秩賜詔并御製宣聖贊幸精微造士二齋

宋史禮志紹興十三年七月國學大成殿告成明年二月國子司業高閎請幸學上從之三月上服鞞袍乘輦入監奠祀如常儀向舍先設次于崇化堂之後及堂上之中南向設御坐閣門設羣臣班于堂下如月朔視朝之儀宰輔從臣次于中門之外上乘輦幸太學降輦于堂入次更衣講官入就堂下講位北向執經官學生皆立于堂下東西相向帝出次升御坐羣臣起居如儀乃

命三公宰輔以下升堂皆就位左右史侍立講書及執經官北面起居再拜皆命之升立于御坐左右學生北面再拜分立兩廡北上內侍進書案牙簽以經授執經官賜三公宰輔以下坐講畢羣臣皆起降階東西相向立執經官降講官進前致詞乃降北面拜左右史降乃賜茶三公以下北面再拜升各立于位後學生北面再拜分兩廡立上下就坐賜茶畢三公以下降階學生自兩廡降皆北面再拜羣臣以次出上降座還次乘輦還宮特命禮部侍郎秦熈執經司業高閎講易之泰遂幸養正持志二齋賜閱三品服學官遷秩諸生授官免舉賜帛有差

孝宗本紀淳熙四年春二月乙亥幸太學御敦化堂命國子祭酒林光朝講中庸下詔遂幸武學監學官進秩

五禮通考卷三十一  
九  
一等諸生推恩賜帛有差六月辛巳班幸學詔

蕙田案玉海云光朝講中庸九經一段云所以行之者一一即中庸也孝宗以為深得聖人之旨先儒所未及

甯宗本紀嘉泰三年春正月戊戌幸太學謁大成殿御化原堂命國子祭酒李寅仲講尚書周官篇遂幸武學監學官進秩一級諸生推恩賜帛有差

理宗本紀淳祐元年春正月戊申幸太學遂御崇化堂命祭酒曹威講禮記大學篇監學官各進一秩諸生推恩賜帛有差製道統十三贊就賜國子監宣示諸生

禮志淳祐元年正月理宗幸太學宗武兩學官屬生員竝赴太學陪位皇帝至崇化堂宰臣使相執政竝起居執經官由東階講官由西階竝升堂于御前分東西相

向立次引國子監三學學官學生一班北面再拜贊各就坐賜茶俟講書畢起立班再拜禮成執經官講書官國子監三學官生員各推恩轉官有差

度宗本紀咸淳三年春正月戊申帝詣太學禮部尚書陳宗禮國子祭酒陳宜中進讀中庸已酉執經官宗禮講經官宜中各進一秩宜中賜紫章服太學武學宗學

國子學宗正等官若醫官監書庫門庖等各進一秩諸齋長諭及起居學生推恩有差

南渡典儀軍駕幸學先期三日儀鸞司及內侍省官至國子監相視八廂亦至學中搜檢次日諸齋生員盡行搬出學外安泊各齋門並用黃封學官預詣御課用黃羅裝背大冊面簽云太學某齋生臣姓某供以大黃羅祇護之置于各齋之前以備駕至點索崇化堂後即聖駕歇泊之所皆設御屏黃羅幃設供御物等凡敕入宮門號止于國子監外門敕入殿門號止于國子監內門敕入禁齋號止于崇化堂天井謂之隔門除司業祭酒外其餘學官前廊長諭並帶黃號于隔門外席地坐賜酒食三品以俟迎駕駕至純禮坊隨駕樂部參軍色念致語雜劇色念口號起引子導駕至大成殿櫺星門禮部太常寺官國子監三學官及三學前廊長諭率諸生迎駕起居上乘輦入門至大成殿降輦有旨免鳴鞭以昭至敬問門太常禮直官前導入御幄太常卿跪奏稱太常卿臣某言

請皇帝行酌獻之禮上出御幄升殿詣文宣王位前三上香跪受爵三祭酒奠  
爵兩拜在位皆兩拜降階歸幄太常卿奏禮畢陪位官並退上乘輦鳴鞭入崇  
化堂降輦入幄更衣上所至皆設御幄禮官國子監官三學官三學生並于堂  
下分東西立次引執經官講書官于堂下東壁西向立宰臣執政以下北向立  
閣門奏班齊上服帽紅上蓋玉束帶絲鞋出崇化堂坐宰臣以下宣名奏聖躬  
萬福御傳旨宣升堂各兩拜贊賜坐分東西階升堂席後立次引執經官講書  
官奏萬福官該宣名者即宣名兩拜次引國子監三學官并三學生奏萬福兩  
拜分引升兩廊席後立內官進書案聽宣以經授執經官進于案上講筵內承  
受對展經冊入內官進牙方舍人贊賜坐宰相以下及兩廊學官生員應喏  
訖各就坐聽講講書官進讀經義執經官執牙篋執讀入內官收撤經書再以下  
講義授講書官講書官指講訖入內官收撤書堂上兩廊官並起分行宰臣以下  
降階講書官當御前躬身致詞北向立兩拜御藥降階宣答云有制謁款至聖  
肅尊視學之儀講書中庸爰命敷經之彥茂明彝訓允當朕心再兩拜御藥傳  
旨宣坐賜茶訖舍人贊躬身不拜各就坐分引升堂席後立兩拜各就坐翰林  
司供御茶訖宰臣以下并兩廊官北向各再拜訖出皇帝起易服幞頭上蓋玉  
帶絲鞋乘輦鳴鞭出學宮諸生迎駕如前隨駕樂部參軍迎駕色念致語雜劇  
色念口號曲起壽同天引子導駕還宮在學前廊  
並該恩出官諸生各有免解恩例餘並推恩有差

金史宗憲傳太宗幸學宗憲與諸生俱謁宗憲進止恂  
雅太宗召至前令誦所習語音清亮善應對上嗟賞久之

元史順宗本紀至正八年帝幸國子學賜衍聖公銀印

陞秩從二品定弟子員出身及奔喪省親等法  
續文獻通考洪武十五年十二月乙丑上遂幸國子監  
謁先師孔子釋菜禮成退御講筵祭酒吳願等以次講  
畢上謂之曰中正之道無踰于儒上古聖人不以儒名  
而德行實儒後世儒之名立雖有儒名或無其實孔子  
生于周末身儒道行儒行立儒教率天下後世之人皆  
欲其中正惜乎魯國君臣無能用之者當時獨公父文  
伯之母知其賢責其子之不能從則一國君臣可愧矣  
卿等為師表正當以孔子之道為教使諸生成趨乎正  
則朝廷得人矣復命取尚書大禹皋陶謨洪範親為講  
說反覆開諭羣臣聞者莫不悚悅遂賜宴竟日而還丙  
寅祭酒吳願率博士龔敷上表謝各賜羅衣二襲官民  
生許恆等四百三十人各賜春夏布衣

明會典視學洪武十五年定前期一日有司灑掃殿堂設御幄於大成門東上南向設御坐於彝倫堂至日學官率諸生迎駕於成賢街左駕至學官及諸生俯伏叩頭興駕入櫺星門止於大成門外上入御幄禮官入奏請具皮弁服次請行禮如常儀導引官導上入御幄易常服陞輿詣學學官率諸生行禮五拜叩頭東西序立於堂下三品以上及侍從官以次入堂東西序立贊進講祭酒司業博士助教四人以次升堂由西門入至堂中贊舉經案於御前禮部官奏請授經於講官祭酒跪受賜講官坐乃以經置講案叩頭就西南隅設几榻坐講賜大臣翰林儒臣坐皆叩頭序坐於東西諸生圍立以聽講畢祭酒叩頭退就本位司業博士助教各以次進講畢出堂門復位贊唱有制學官諸生列班俱北面

跪聽宣諭五拜叩頭禮畢學官率諸生出成賢街跪俟駕還明日祭酒率學官上表謝恩

續文獻通考永樂四年三月辛卯朔幸學親行釋菜禮畢上御彝倫堂命坐講祭酒胡儼講尚書堯典司業張智講易泰卦大臣及翰林院詞官皆賜坐講畢宣諭曰六經聖人之道彌綸天地昭揭日月垂憲萬世率由彝訓與卿等皆勉之遂命光祿寺賜百官茶次日早祭酒胡儼等上表及箋稱謝賜祭酒以下宴于奉天門監生宴于丹墀仍賜儼及司業張智紵絲羅衣人二襲學官王進用等三十五人紵絲衣人一襲監生朱璿等三千七十四人鈔各五錠時禮部會試舉人中式者璿第一故璿爲諸生班首云壬辰命工部修太祖高皇帝詔書碑亭禮部奏立視學之碑上親爲製文

明史禮志正統五年帝幸國子監如儀禮畢賜公侯伯駙馬武官都督以上文官三品以上及翰林學士至檢討宴國子監祭酒至學錄宴

續文獻通考景泰二年二月初三日幸學是日祭酒蕭鎡講書經皋陶謨天聰明一章司業趙琬講周易泰卦象辭

明會典成化元年續定前期一日國子監灑掃殿室內外錦衣衛設御幄於大成門之東上南向設御坐於彝倫堂正中鴻臚寺設經案於堂內之左設講案於堂內之西南至日置經於經案百官免朝先詣國子監門外迎駕駕從東長安門出鹵簿大樂以次前導樂設而不作學官率諸生迎上至大成門外入御幄禮官入奏請具服上具皮弁服訖請行禮導引官導上出御幄中道

詣大成殿行禮出上入御幄易常服訖禮官入奏請幸彝倫堂上陞輿禮官前導由櫺星門出從太學門入諸生先分立於堂下東西學官列於諸生前駕至學官諸生跪伺駕過然後起仍前序立百官分列堂外稍上左右侍立上至彝倫堂陞御座贊學官諸生行五拜叩頭禮武官都督以上文官三品以上及翰林院學士陞堂執事者各以次序立贊進講祭酒司業以次陞堂由東西小門入至堂中執事官舉案於御前禮官奏請授經於講官祭酒跪受經受畢上賜講官坐祭酒乃以經置講案叩頭就西南几榻坐講上賜武官都督以上文官三品以上及翰林院學士坐皆叩頭序坐於東西諸生圍立於外以聽祭酒講畢叩頭退就本位司業進講如儀畢出堂門復位贊有制學官諸生列班俱北面跪聽



宣諭畢贊行五拜叩頭禮畢學官諸生以次退先從東西小門出列於成賢街之右伺候尙膳監進茶御前上命光祿寺賜各官茶畢各官退列於堂門外叩頭東西序立上起陞輿由太學門出陞輦鹵簿大樂前導樂作駕出太學門學官諸生伺駕至跪叩頭退百官常服先詣午門外伺候駕還鹵簿大樂止於午門外上御奉天門鳴鞭百官常服行慶賀禮鴻臚寺致詞云恭惟皇上敬禮先師親臨太學增光前烈不闕鴻猷臣等欣逢盛事禮當慶賀行禮畢鳴鞭駕興還宮百官退明日國子監祭酒率學官諸生上表謝恩

續文獻通考孝宗宏治元年幸學

闕里志正德元年武宗視太學

明史禮志嘉靖元年定衍聖公率三氏子孫祭酒率學

官諸生上表謝恩皆賜宴于禮部

十二年以先儒祀典既正再視學

續文獻通考隆慶元年五月命公侯伯應襲子弟俱赴國子監習禮八月癸未朔上幸太學行釋奠於先師上御彝倫堂命武官都督以上文官三品以上及翰林院學士坐賜茶授祭酒司業經坐講上宣諭師生曰聖人之道如日中天講究服膺用資治理爾師生其勉之

闕里志隆慶元年八月初一日駕幸太學

續文獻通考神宗元年八月上幸太學賜輔臣羊酒鈔錠有差

闕里志神宗四年駕幸太學

崇禎二年正月二十日駕幸太學

右歷代視學

禮記王制王太子王子羣后之太子卿大夫元士之適子國之後選皆造焉凡入學以齒疏長幼受學雖王太子亦然

文王世子行一物而三善皆得者唯世子而已其齒於學之謂也故世子齒於學國人觀之曰將君我而與我齒讓何也曰有父在則禮然然而眾知父子之道矣其二曰將君我而與我齒讓何也曰有君在則禮然然而眾著於君臣之義也其三曰將君我而與我齒讓何也曰長長也然而眾知長幼之節矣故父在斯為子君在斯謂之臣居于與臣之節所以尊君親親也故學之為父子焉學之為君臣焉學之為長幼焉父子君臣長幼之道得而國治語曰樂正司業父師司成一有元良萬國以貞世子之謂也注司主也一人也元大也良善也貞正也疏子知君臣知長幼也云父在則禮然君在則禮然直云長長不言兄在則禮然者世子無兄故也國人謂不知禮者疑而發問也自有父在則禮然者是知禮者曉其

意而答之也父在則常須謙退不敢居人之前故云父在則禮當如此父子天性自然故云道君臣以義合故云義長幼有等級上下故云節世子惟在學受業時與國人齒若朝會飲食則各以位之尊卑諸子職云辨其等正其位是也國人間世子居臣子之禮於是各知尊其君父故世子所以父在為子禮君在為臣禮也斯語辭也云謂之臣者世子於君雖曰君臣異於義合也樂正主太子詩書之業父師成就其德行一人謂世子也一人有大善則萬國以正也  
祭義當入學而太子齒注文王世子曰行一物而三善皆得惟世子而國人效云而太子齒

梁書儒林傳天監七年詔大啟庠敦博延胄于是皇太子皇子宗室王侯始就業焉

武帝本紀天監九年三月乙未詔曰皇子從學著自禮經貴遊咸在實惟前誥所以式廣義方克隆教道今成均大啟元良齒讓自斯以降並宜肄業皇太子及王侯之子年在從師者可令入學

隋書禮儀志大同七年皇太子表其子甯國臨城公入學時議者以與太子有齒胄之義疑之侍中尚書令臣

敬容尚書僕射臣纘尚書臣僧旻臣之遴臣筠等以爲  
參點竝事宜尼回路同諮泗水鄒魯稱盛洙汝無譏師  
道旣光得一資敬無虧亞貳況于兩公而云不可制曰  
可

唐書元宗本紀開元七年十一月乙亥皇太子入學齒  
胄賜陪位官及學生帛

禮樂志開元七年皇太子齒胄于學謁先聖詔宋璟亞  
獻蘇頌終獻臨享天子思齒胄義乃詔三獻皆用胄子  
祀先聖如釋奠右散騎常侍褚無量講孝經禮記文王  
世子篇

開元禮皇太子束脩束帛一篚五匹酒一壺二斗脩一  
案五脰其日平明皇太子服學生之服其服青衿至學  
門外博士公服執事者引立學堂東階上西面相者引

皇太子立于門外之東西面陳束帛壺酒脯案于皇太  
子之西面當門北向重行西上將命者出立門西東面  
曰敢請就事皇太子少進曰某方受業于先生敢請見  
將命者入告博士曰某也不德請皇太子無辱將命者  
出告皇太子曰某不敢爲儀敢固請將命者入告博士  
曰請皇太子就位某敢見將命者出告皇太子曰某不  
敢以視賓客請終賜見將命者入告博士曰某辭不得  
命敢不從將命者出告執篚者以篚東面授皇太子皇  
太子執篚博士降俟于東階下西面相者引皇太子執  
事者奉壺酒脩案以從皇太子入門而左詣西階之南  
東面奉酒脩者立于皇太子西南東面北上皇太子跪  
奠篚再拜博士答再拜皇太子還避遂進跪取篚相者  
引皇太子進博士前東面授幣奉壺酒脩案者從奠于

博士前博士受幣執事者取酒脩幣以東相者引皇太子立于階間近南北面奉酒脩者出皇太子拜訖相者引皇太子出

皇太子釋奠于孔宣父禮畢既入便次改服常服執經侍講執讀執如意等及三館學官並服公服學生仍青衿服餘皆常服掌儀帥贊者先入就位謁者各引羣官及學生等次入就位左庶子版奏外辦皇太子乘輿出便次若須乘馬臨時聽進止侍衛如常儀至學堂後降輿升自北階卽座坐左右侍衛量人從升太傅少傅各就座坐掌儀曰再拜贊者承傳羣官及學生等在位者皆再拜執經不拜左庶子跪奏請令執經等升俯伏興又左庶子稱令曰諾左庶子退降詣西階下立于執經等之前北面宣令曰執經以下並升座應坐者皆再拜

執經不拜通事舍人引執經以下升各就座坐其升坐者皆脫履如式訖執讀讀所講經執經釋義訖執如意者以如意授侍講侍講興受進詣論議座北面問所疑執經爲通之訖興退以如意授執者退還本座執如意者以如意次授諸侍講者皆如上儀總訖左庶子跪奏禮畢羣官皆起通事舍人各引降復堂下位皇太子降座降自北階入學堂後便次羣官以次出執經以下改服常服學生仍青衿服

蕙田案通典載皇太子釋奠儀自陳設至還宮儀注甚詳此專錄其講學一節

又案世子齒胄之禮秦漢以後廢不復講其見于史冊者惟梁天監唐開元二事耳若後代東宮出閣講學諸儀雖亦毓德之要務而

無關於學校故不錄

右世子齒學

大戴禮武王踐阼三日召士大夫而問焉曰惡有藏之約行之行萬世可以爲子孫常者乎諸大夫對曰未得聞也然後召師尙父而問焉曰黃帝顓頊之道存乎意亦忽不可得見與師尙父曰在丹書王欲聞之則齊矣三日王端冕師尙父亦端冕奉書而入負屏而立王下堂南面而立師尙父曰先王之道不北面王行西折而南東面而立師尙父西面道書之言曰敬勝怠者吉怠勝敬者滅義勝欲者從欲勝義者凶凡事不强則枉弗敬則不正枉者滅廢敬者萬世藏之約行之行可以爲子孫常者此言之謂也且臣聞之以仁得之以仁守之其量百世以不仁得之以仁守之其量十世以不仁得

之以不仁守之必及其世王聞書之言惕若恐懼退而爲戒書於席之四端爲銘焉于几爲銘焉于鑑爲銘焉于盥盤爲銘焉於楹爲銘焉于杖爲銘焉于帶爲銘焉于履履爲銘焉於觴豆爲銘焉於戶爲銘焉於牖爲銘焉於劍爲銘焉於弓爲銘焉於矛爲銘焉

蕙田案三代聖王終始典學緝熙光明設三公之官坐而論道又有師氏保氏掌以媿詔王王舉則從其時雖不聞有經筵之名然大戴禮稱帝入太學承師而問道而學記亦云太學之禮雖詔於天子無北面蓋古聖待講學之臣其崇重如此大戴禮有武王踐阼一篇稱王下堂東面立師尙父西面授王丹書與經筵之儀相近後代舉經筵不於太學而

於殿廷亦相類也故錄以爲經筵之緣起云  
漢書宣帝本紀甘露三年三月己丑詔諸儒講五經同  
異太子太傅蕭望之等平奏其議上親稱制臨決焉  
後漢書章帝本紀建初四年十一月壬戌詔下太常將  
大夫博士議郎郎官及諸生諸儒會白虎觀講議五經  
同異帝親稱制臨決如孝宣甘露石渠故事

蕙田案宣帝之講石渠章帝之講虎觀此講  
經殿中之始然其時特令諸儒講議異同稱  
制平決蓋二主皆以通經爲尙藉此風示天  
下也

玉海唐元宗開元三年九月戊寅詔左散騎常侍馬懷  
素與右常侍褚無量更日侍讀

潛確類書經筵歷代無專官漢宣帝詔諸儒講五經

于石渠閣唐元宗改麗正修書院爲集賢院選耆儒  
日一人侍讀以質史籍疑義置集賢侍讀學士褚無  
量馬懷素爲侍講每入闕門則令乘肩輿以進

王圻續通考唐穆宗召韋處厚路隋爲侍讀命講書

蕙田案內殿侍讀昉於唐時尙無經筵之名

玉海太祖建隆三年六月召宗丞趙孚講易于後殿

開寶三年召王昭素賜坐便殿講乾卦

天禧舊制侍臣皆賜坐講者別坐而聽乾興後侍臣先  
賜茶畢徹席立講畢復坐賜湯侍讀無所職但侍立而  
已自宋綬夏竦侍讀始令日讀唐書一傳又讀正說講  
日帝親書古賢詩或經書要言一二紙

宋史仁宗本紀景祐元年正月丁亥置崇政殿說書

玉海命賈昌朝趙希賢王宗道楊安國竝爲崇政殿

說書日以二人侍講說

二年春正月癸丑置邇英延義二閣寫尚書無逸篇于屏

東齋紀事宋崇政殿西有延義閣南向迎陽門之北有邇英閣東向皆講書所仁宗初御延義每令講論或講讀終篇則宣二府大臣同聽賜飛白書或賜宴其後專御邇英也

玉海慶歷二年二月丁丑召中丞賈昌朝侍講于邇英閣憲府侍經筵自此始

天聖以前講讀官皆坐侍自景祐以來皆立侍皇祐三年九月丁丑詔講讀臣僚立侍敷對餘皆賜坐侍于閣中

程頤論經筵第三劄子臣竊以人主居崇高之位持

威福之柄百官畏懼莫敢仰視萬方承奉所欲隨得苟非知道畏義所養如此其惑可知中常之君無不驕肆英明之主自然滿假此自古同患治亂所繫也故周公告成王稱前王之德以寅畏祇懼為首從古以來未有不尊賢畏相而能成其聖者也皇帝陛下未親庶政方專問學臣以為輔養聖德莫先寅恭動容周旋當主于此歲月積習自成聖性臣竊聞經筵臣寮侍者皆坐而講者獨立于禮為悖欲乞今後時令坐講乃與義理為順所以養主上尊儒重道之心取進止

經筵前一日進講義自元豐元年陸佃始

宋史禮志元祐二年九月經筵講論語徹章賜宰臣執政經筵官宴于東宮帝親書唐人詩分賜之

玉海元祐二年侍讀蘇頌請詔史官學士錄新舊唐書日進數事十一月壬申詔經筵官遇非講讀日進漢唐故事二條

言行錄程伊川在經筵當進講必宿齋豫戒潛思存誠以感動上心哲宗幼冲正叔以師道自居每侍上講色甚莊繼以諷諫上畏之正叔曰吾以布衣爲上師傅其敢不自重一日講讀罷未退上忽起憑檻折柳枝伊川進曰方春發生不可無故摧折文潞公與呂范諸公入侍經筵聞伊川講說相與歎曰真侍講也

程頤論經筵第一劄子臣伏觀自古人君守成而致盛治者莫如周成王成王之所以成德由周公之輔養昔者周公輔成王幼而習之所見必正事所聞必正言左右前後皆正人故習與智長化與心成今士大夫家善教子弟者亦必延明德端方之士與之居處使之薰染成性故曰少成若天性習慣如自然伏以皇帝陛下春秋之富雖睿聖之資得于天稟而輔養之道不可不至所謂輔養之道非謂詔告以言過而後諫也在涵養薰陶而已大率一口之中親賢士大夫之時多親寺人宮女之時少則自然氣質變化德器成就欲乞朝廷慎選賢德之士以侍勸講講讀既罷常留二人直日夜則一人直宿以備訪問皇帝習讀之暇游息之間時於內殿召見從容宴語不獨漸磨道義至於人情物態稼穡艱難積久自然通達比之常在深宮之中爲益豈不甚大竊聞間日一開經筵講讀數行羣官列侍儼然而退情意略不相接



如此而責輔養之功不亦難乎今主上幼冲太皇太后慈愛亦未敢便乞頻出但時見講官久則自然接熟大抵與近習處久熟則生藝慢與賢士大夫處久熟則生愛敬此所以養成聖德爲宗社生靈之福天下之事無急於此取進止

論經筵第二劄子臣聞三代之時人君必有師傅保之官師道之教訓傳傳其德義保保其身體後世作事無本知求治而不知正君知規過而不知養德傳德義之道固已疏矣保身體之法復無聞焉伏惟太皇太后陛下聰明睿哲超越前古皇帝陛下春秋之富輔養之道當法先王臣以爲傳德義者在乎防見聞之非節嗜欲之過保身體者在乎適起居之宜存畏慎之心臣欲乞皇帝左右扶侍祇應宮人內臣並

選年四十五已上厚重小心之人服用器玩皆須樸質一應華巧奢麗之物不得至於上前要在侈靡之物不接於目淺俗之言不入於耳及乞擇內臣十人充經筵祇應以伺候皇帝起居凡動息必使經筵官知之有翦桐之戲則隨事箴規違持養之方則應時諫止調護聖躬莫過於此取進止

蕙田案程子經筵二劄子於涵養主德啟沃君心之道可謂反覆詳盡千古之通義也

宋史高宗本紀建炎四年八月甲戌詔侍從官日一員輪直進故事關治體者

玉海建炎四年八月四日謝克家請講日輪侍從進前代本朝故事涉治體者三事十八日綦崇禮奏止命講讀翰林學士兩省官進之九月三日令講筵置厯

紹興二年胡安國侍讀專講春秋時講官四人援例乞各專一經上曰他人通經豈安國比不許

孝宗隆興元年十一月詔學士院經筵官日以二員宿直

系年錄淳熙七年講筵讀三朝寶訓終篇史浩奏曰陛下雙日御前後殿與宰執裁決又引臣寮班對日盱方罷隻日又御講筵依故事讀數百言恐勞聖躬上曰朕樂聞謨訓雖隻日休服亦當特坐自是講讀上必注目傾耳率漏下十刻方罷

朱熹乞不以假故逐日進講劄子臣伏見近制每遇隻日早晚進講及至當日或值假故卽行權罷又案故事將來大寒大暑亦係罷講月分恭聞陛下天性好學晨夕孜孜雖處深宮必不暇逸但臣誤蒙選擇

以經入侍固當日有獻納以輔聖志今乃淹旬累月不得修其職業素食之刺實不自安故嘗面奏假日無事正宜進講已蒙聖慈俛賜嘉納今已兩日未見施行因省昨來所陳似亦未至詳悉今別具奏欲乞聖明特降睿旨今後除朔望旬休及過宮日外不以寒暑雙隻月日諸色假故竝令逐日早晚進講內有朝殿日分伏恐聖躬久坐不無少勞卻乞權住當日早講一次庶幾藏修遊息無非典學之時聖德日躋天下幸甚取進止

輟耕錄天厯初建奎章閣于西宮興聖殿之西廊爲屋三間高明敞爽南間以藏物中間諸官入直所北間南向設御座右列珍玩命羣玉內司掌之閣官署銜初名奎章閣階正三品隸東宮屬官後文宗復位乃陞爲

奎章閣學士院階正二品置大學士五員竝知經筵事  
侍書學士二員承制學士二員供奉學士二員竝兼經  
筵官幕職置參書二員典籤二員竝兼經筵參贊官照  
磨一員內掾四名內二名兼檢討宣使四名知印二名  
譯史二名典書四名屬官則有羣玉內司階正三品置  
監羣玉內史一員司尉一員亞尉二員僉司二員典簿  
一員令史二名典吏二名司鑰二名司膳四名給使八  
名專掌祕玩古物藝文監階正三品置太監兼檢校書  
籍事二員少監同檢校書籍事二員監丞參檢校書籍  
事二員或有兼經筵官者典簿一員照磨一員令史四  
名典吏二名專掌書籍鑿書博士司階正五品置博士  
兼經筵參贊官二員書吏一名專一鑿辨書畫授經郎  
階正七品置授經郎兼經筵譯文官二員專一訓教怯

薛官大臣子孫藝林庫皆從六品置提典一員大使一  
員副使一員司吏二名庫子一名專一收貯書籍廣成  
局階從七品置大使一員副使一員直長二員司吏二  
名專一印行祖宗聖訓及國制等書特恩創製象齒小  
牌五十上書奎章閣三字一面篆字一面蒙古字與畏  
吾兒字分散各官懸佩出入宮門無禁學士院凡與諸  
司往復惟劄送參書廳行移而已命侍讀學士虞集撰  
記御書刻石閣中今改奎章曰宣文

元史黃潛傳潛兼經筵官執經進講者三十有二帝  
嘉其忠數出金織文段賜之

亦憐真班傳真班以御史大夫知經筵事經筵進講  
必詳必慎故每讀譯文必被嘉納

蕙田案元之文宗可稱右文然其時奎章閣

諸臣如虞伯生歐陽原功揭曼碩黃晉卿輩  
迺一時能文之士以檢校圖籍等事爲上所  
寵禮與古啟心沃心之道殊矣

王圻續通考太祖既有婺州遂分置中書省召儒士許  
瓊葉瓚胡翰吳沈汪仲山李公常金信徐葉童義戴良  
吳復張敬起孫履等皆會食中書日召二人進經史敷  
陳治道此論道講學之始乙巳春正月上御端門論及黃石公三  
略且口釋之起居注宋濂對曰尚書二典三謨帝王大  
經大法靡不畢具願主上留意講明上曰吾非不知典  
謨爲政治之要但三略乃用兵攻取時務所先耳是日  
遂命濂以尚書進講是年始置博士廳令博士許存仁  
等日講尚書等書及改元洪武之初每令文學侍從之  
臣於御前講說經史無定日亦無定所旣而設華蓋文

華武英等殿說書以儒士沈德等爲之未幾改翰林官  
及殿閣大學士專其事遂罷說書然每進講必反復討  
論以求通義理之極講畢必議及政事以爲常

洪武三年庚戌春二月上御東閣命學士宋濂待制王  
禕進講大學傳之十章濂等反覆解說至有士有人上  
諭之曰人者國之本德者身之本德厚則人懷人懷則  
國固故人主有仁厚之德則人歸之如父母人心歸則  
有土有財自然之理也若德不足以懷眾雖有財亦何  
用哉

十六年癸亥秋八月上御謹身殿命東閣大學士吳沈  
等進講周書立政至罔有立政用儉人上歎曰有小人  
必敗君子故唐虞任禹稷必去四凶魯用仲尼必去少  
正卯沈進曰小人懷奸甚似忠信不可不察上曰然

十八年甲子秋九月上御華蓋殿大學士朱善以周易進講至家人卦上歎曰齊家治國其理無二使一家之間長幼內外各盡其分事事循理則一家治矣一家既治達之一國以至天下亦舉而措之耳朕觀其要只在誠實而有威嚴誠則篤親愛之恩嚴則無閹門之失善對曰誠如聖諭又一日御華蓋殿召善進講心箴畢上曰人心道心有倚伏之機蓋仁愛之心生則忤害之心息正直之心存則邪詖之心消羞惡之心形則貪鄙之心絕忠慤之心萌則巧僞之心伏常持此心不爲情欲所蔽至公無私自無物我之累耳

成祖永樂二年甲申夏六月朔御文華殿大學士楊士奇以大學講義進上覽其文善之因諭之曰帝王之學貴切已實用講說之一切浮泛無益之語勿用且先儒

謂克明峻德一章一部大學皆具士奇對曰堯舜禹湯文武數聖人凡修諸躬施于家國天下者皆大學之理誠聖學所當先務是年秋八月學士解縉以大學正心章講義進上覽之因諭縉等曰人君誠不可有所好樂一有好樂流而不返則欲必勝理若心能靜虛事來則應事去則忘如明鏡止水自然純是天理朕每退朝默坐未嘗不思管束此心爲切要思爲人君但于宮室車馬服食玩好無所增加則天下自然無事矣命翰林春坊諸臣分撰諸經講義與閣臣再閱有未當處悉與改正然後呈講乃以解縉屬書胡廣屬詩金幼孜屬春秋楊士奇屬易其義有疑必召四人辨析暢而後已宣宗宣德二年丁未春二月己酉御文華殿召翰林進講離婁篇至二老歸文王章問曰伯夷太公皆處東海

而歸文王及武王伐紂太公佐之伯夷叩馬而諫所見何以不同講官對曰太公以救民爲心伯夷以君臣爲重上曰太公之心在當時伯夷之心在萬世無非爲天下生民也

觀承案太公之心在當時伯夷之心在萬世宣宗此語可謂深知兩聖人之心然卽此校之而伯夷之品終在太公之上可知矣孟子舉三聖人必以伯夷爲首而六百年前之伊尹亦不得先之其亦此意也歟

三年戊申春二月進講舜典上曰觀二典三謨則知萬世君臣爲治之道不出乎此歷象日月星辰以閏月定四時天道以明治水土奠高山大川別九州任土作貢地道以成克明峻德以至協和萬邦人道以建九官十

二牧所掌禮樂刑政養民之道後世建官繁簡雖不同要不出乎此當時君臣都俞吁咈更相告戒用圖治功氣象藹然何後世之不能及講臣對曰明良相逢故治化之盛如此上又曰天生聖人爲後世法孔子刪書斷自唐虞使人知有堯舜所謂萬世帝王之師也是年冬十月庚寅進講春秋上曰聖人匡世之功憂世之心備見此書當時先王禮樂法度日以隳廢亂臣賊子接迹而起有此書而後天下知尊周又曰孔子作此書以尊周爲本孟子乃以王天下勸齊梁之君何也對曰孔子之時天下猶知宗周孟子之時不復知有周矣上曰聖賢之心實爲天下生民計孟子時不有王者興何以解生民之塗炭因命左右出菜茗以賜講官

王氏圻曰宣德以前每視朝畢無日不御文華殿或

便殿召大臣及諸儒臣講經書咨政事時經筵未有  
開也殿閣詞林記云洪武中令儒臣更番入禁中每  
日輪一員進講侍直誤者罪之如大學士吳沈嘗坐  
進講遲誤被劾永樂以後多渥典自設經筵後講官  
不復入直惟令翰林及春坊經局等官相輪侍班久  
之選爲展書官又自展書乃得充月講官若日講則  
用年資深而品秩尊者又云祖宗時講官于講書後  
得言時政闕失及陳論所見成祖寶訓云上視朝之  
暇輒召儒臣至便殿閱書史或召翰林儒臣講詢永  
樂以後益莫不然

蕙田案據此則明代日講官之外又有月講  
官

英宗正統元年春二月始開經筵遂命禮部翰林院詳  
定講筵禮儀著爲制時上以幼沖嗣位大學士楊士奇  
等奏云去年十月宣宗皇帝御左順門召臣士奇輩諭  
之曰明年春煖東宮出文華殿講書凡內外侍從慎擇  
賢良廉謹之臣未幾不幸先帝上賓臣未敢遽言此事  
至重不敢久默今山陵事畢乞早開經筵以進聖學預  
命禮部吏部翰林院公同慎擇講官必學問貫通言行  
端正老成重厚識達大體者以供其職又曰天子就學  
其事體與皇太子親王不同乞先命禮部翰林院詳定  
講筵禮儀制曰是以今月初九十九日御經筵爾翰林  
春坊儒臣分直侍講乃命太師英國公張輔知經筵事  
少傅兵部尚書兼華蓋殿大學士楊士奇少傅工部尚  
書兼謹身殿大學士楊榮禮部尚書兼學士楊溥同知  
經筵事詹事府少詹事兼侍讀學士王直少詹事兼侍

講學士李時勉錢習禮陳循侍讀苗衷侍講高穀修撰  
馬愉曹鼐兼經筵官仍賜宴及金幣有差遂爲定制續  
定經筵儀注每月三日日以逢二爲期歲率以二八月  
中旬起四十月末旬止用勳臣一人知經筵事內閣大  
學士一二人同知經筵事六部尙書左右都御史通政  
司大理寺卿及學士等官侍班翰林院春坊等官及國  
子監祭酒二員進講二員展書給事中御史各二員侍  
儀鴻臚寺錦衣衛堂上官各一員供事又鳴贊一員贊  
禮序班四員舉案侯伯各一人領將軍侍衛先期直殿  
中官于文華殿設御座及設御案于御座之東稍南講  
案于御案之南稍東是日早司禮監官先陳所講四書  
經史各一冊置御案又各一冊置講案先四書東經西  
史先期輪講官撰四書經或史講章各一篇預置于冊

內是日早上御奉天門早朝畢退御文華殿陞御座將  
軍侍衛如儀鴻臚寺官引知經筵及侍班講讀執事侍  
儀等官于丹陛上行五拜三叩頭禮畢以次上殿依品  
級東西序立知經筵官序于侍班官上侍儀御史給事  
中各二員于殿內之南分東西北向立序班二員舉御  
案置御座前二員舉講案置御座之南正中鴻臚官贊  
進講講官一員從東班出一員從西班出詣講案前稍  
南北向竝立鴻臚寺官贊鞠躬拜叩頭興平身畢展書  
一員從東班出進詣御案前跪展四書畢起退立于御  
案之東稍南講官一員進講詣御前立奏講某書講畢  
稍退展書官復詣御案前跪掩四書畢退就東班又展  
書官一員從西班出進詣御案前跪展經畢起退立于  
御案之西稍南講官一員進至講案前立奏或某經或



某史畢少退仍展書官復詣御案前跪掩書畢退就西班鴻臚寺贊講官鞠躬拜叩頭興平身禮畢各退就東西班序班二員舉講案退置原所鴻臚寺官贊禮畢命賜宴鴻臚寺等官及講官皆跪承旨光祿寺官設宴于左順門宴畢叩頭出正統初立制如此

天順八年秋八月卽位遂開經筵日講期如舊每兩人一書一經講章皆預呈內閣轉付中書繕錄正副各一紙先日進司禮監官奏知先一晚于文華殿內寶座地平之南設香鶴香爐左右各一于左香爐之東稍南設御案講案各一皆西向案上各置所講二書以夾講章各壓以金尺一副至期早朝近侍內臣及知經筵官并內閣大學士及講官六部尚書都御史大理卿通政使鴻臚卿錦衣指揮使及四品以上寫講章官俱繡金緋

袍其展書翰林官侍儀御史給事中序班鳴贊等俱金繡服朝畢駕起御文華殿皆隨之大漢將軍凡二十名導駕至左順門上退易冠帶便服其侯伯或一人服金繡蟒衣仍領將軍趨越眾官進左順門皆分班綴行立文華殿外俟傳宣云進來則將軍先入殿內負東西牆立諸官陞陞鴻臚寺卿贊入班行禮畢以次分由殿東西門入重班立指揮則立西一班末稍前御史給事中序班六員分于中門左右北向立序班二人舉御案進上二人舉講案置中鳴贊唱進講講官各出班立講案前展書官二員出班對立鳴贊唱講官竝行禮興東展書官進至地平膝行詣御案展四書官亦稍前近案俟展書官復位乃先說講某書然後申講講畢掩書稍退後原展書官仍如儀進掩書復位西展書官與講經官

進退俱如前儀講畢仍竝行禮各回班序班各撤案置  
舊所鴻臚寺卿中跪奏禮畢上命官人每喫酒飯各官  
跪承旨興以次出丹陛仍行禮乃出左順門宴以官敘  
惟學士之坐立則序于鴻臚卿及四品以上寫講章官  
及展書官坐立亦序于四品以下重職事也

雙槐歲抄景皇帝時每講畢命中官布錢于地令講  
官拾之以爲恩典高穀年老俯伏不便恆莫能得一  
講官拾以遺之識者病其媿瀆

孝宗宏治元年戊申春三月十二日開經筵賜學士程  
敏政等宴及白金寶鏹次日上御文華殿後進講尚書  
孟子及午進講大學衍義以爲常講畢賜茶上皆呼先  
生而不名自是四月二十八日五月二十九日七月二  
十日皆盛暑不廢云時上最嗜經筵親儒臣學士張元

禎矮小每進講上俯几聽之

十四年辛酉夏四月開經筵又改初四日逢二會講定  
期也是月之初二日當會講以享太廟有旨改初三至  
期遇雨又改初四日蓋孝宗務學之勤不以事而廢如  
此

十七年甲子秋九月三十日召李東陽劉健等至煖閣  
先是上御經筵罷因聽所講義退思之有得及是亟召  
東陽等至謂之曰劉機講陳善閉邪陳字改做陳說不  
是止云敷陳其說乃可耳劉健因進言昨說以善道啟  
沃他他字不是上笑曰他字也不妨大抵講書須要明  
白透徹直言無諱道理皆是書上原有的不是纂出若  
不說盡也無進益且先生輩與翰林院是輔導之職皆  
所當言謝遷對曰聖明如此講官愈好盡心李東陽對

日今年聖學緝熙中外臣民無不仰戴臣等敢不仰承聖意孝宗因諭之曰先生可傳與他不必顧忌耳尋謂他字亦不妨蓋舊者多寓諛詞至是經筵知上意嚮每講必加以規諫而亦未嘗少忤云

觀承案經筵日講比視學尤重視學固可以鼓舞人心昌明正學經筵日講乃所以切磨經訓輔成聖德也然須愷切感動方為有益孝宗此諭可謂有實心求道之意矣

昭代典則正德二年春上御經筵講書故事講解書義畢必獻規諫之語是日詹事楊廷和學士劉忠直講既罷上謂劉瑾曰經筵講書耳何書外添出許多說話瑾與廷和等皆舊東宮官奏曰此二人當打發南京去陞二人南京侍郎是時南京無缺皆添註之雖若遠之實

陞之也

王圻續通考世宗嘉靖二年八月御文華殿召講臣至首揭書經君子所其無逸章繼而講康誥惟民康乂章召誥顧畏民暑章孟子踐形章理義悅心章被袵衣鼓琴章君子反經章是日上御黼座橫經俯詢虛心聽納如此他日講官劉龍進孟子至誠章上批曰龍于至誠能動乃云邇者黃河清是至誠之驗也未免近諂但其末云謙以履盈約以保泰此二句卻好又講官倫以訓進論語陽膚為士師講義上批云以訓講哀矜勿喜云是慈悲憐憫夫慈悲二字是釋氏之教也講官魏校進書經罪疑惟輕章講說上批云桂萼薦校善講義朕觀其講章竝未有過人者且其前後率多諛詞難居近侍着吏部調南京用之

十二年癸巳夏五月召講官廖道南進講論語高宗諒陰以下三句又明日進講大學衍義時汪鉉爲吏部尙書懇祈大學士張孚敬改題以其有君薨聽于冢宰句也道南執不肯孚敬遂具揭帖以進世宗批云覽卿等奏朕已悉舊日講官徐縉講孟敬子撤去二節人之將死不講夫死生人道之常何諱之有如卿等言則忠讜之論何由得聞還着道南照舊進講明日道南講畢進說云按說命夢帝賚予良弼其代予言又云其惟不言言乃雍卽是以觀古之人君心純乎孝故宅憂而不暇于有言古之人臣心純乎忠故攝政而不嫌于代言然必有高宗之聖而後可以用傳說之言必有傳說之賢而後可以輔高宗之德不然則莽操懿溫之流又將以冢宰藉口于千萬世矣孚敬聞之出謂鉉曰講官欲中

傷之又明日進講大學衍義許敬宗立武昭儀章及李林甫嫉李邕章楊國忠比李輔國章元載陷顏真卿章盧杞嫉張鑑章李逢吉去王守澄章江充害戾太子章孚敬滋不悅明年秋七月三日輪顧鼎臣席春進講時鼎臣飲于所識者因大醉誤期明日鼎臣懼罪向孚敬說孚敬爲請因反參道南及蔡昂不行代講遂謫道南于徽州昂湖州蓋爲鉉反噬也未幾皆召還

神宗二年定春講以二月十二起至五月初二日止秋講以八月十二日起至十月初二日止不必題請日講儀講官凡四員日輪二員先大學衍義次貞觀政要二書皆不用講章惟各以黃票書所起止預進先日內臣設御案于文華殿後穿堂中以二書并起止置案上至日早朝畢四講官同內閣隨駕入至殿內來日二

講官授二臣以來日起止直講官俟召乃入穿堂門內行禮分班北向前後立東班當講者詣御案前內侍授以牙籤左右執之且指且講書則向上初展後掩皆屬內侍講畢完籤復位西班當講者乃進講悉如東儀講畢上諭先生喫酒飯皆跪承旨行禮禮前後皆一拜三叩頭出宴于文華門外西廡禁中謂之小經筵或謂之小講云

明會典日講儀上御文華穿殿止用講讀官內閣學士侍班不用侍衛侍儀執事等官侍班講讀等官入見行叩頭禮東西分立先讀四書次讀經或讀史每本讀十數遍直講官先講四書次講經或講史務在直說大義明白易曉講讀後侍書官侍上習書畢各官叩頭退每三日一溫講將前所講書通講一遍若講官中有事故

同列代講其直講則講畢補進

蕙田案明神宗三年閣臣以史職曠廢議開館局以東西十館密邇朝堂紀述爲便乃以東館近上四所令史臣分直其中一起居二吏戶三禮兵四刑工日輪日講官一員專記起居兼錄聖諭詔敕冊文其六曹章奏則選史官中年深而文學素優者六人分纂因定常朝御門日記注起居官及史官侍班之制日講官繫起居注銜自此始也

講大學衍義儀嘉靖六年定每月初三初八十三十八二十三二十八日用經筵日講官二員進講內閣學士一員侍班講畢賜茶賜酒飯俱如日講儀無逸殿講儀嘉靖十年定先一日司禮監官於無逸殿

設御座御案及講案如文華殿日講之儀是日質明上具常服乘輦至無逸殿門眾官於門外迎候上降輦乘板輿至殿內降輿陞御座鴻臚寺官贊各官於殿門外入班行一拜三叩頭禮畢進入殿內各照品級東西序立序班二員舉御案置御座前二員舉講案置殿門內西邊東向設坐位鴻臚寺官贊進講講官大學士一員出班行叩頭禮上命賜講官坐講官并鴻臚寺官承旨贊叩頭訖展書官詣御案前跪展講章退講官坐講畢展書官詣御案前跪掩講章講官叩頭訖復班又大學士一員出班叩頭承旨坐講展書官一員展書俱如前儀序班二員舉御案二員舉講案退至原所鴻臚寺卿奏禮畢有旨賜宴眾官承旨訖退至闕風亭前迎候上乘板輿至亭內降輿陞御座賜宴

午講儀隆慶六年定每日早閣臣及講官講畢各退上進煖閣少憩司禮監將各衙門奏章進上御覽閣臣等退西廂房伺候上有所諮問即召至御前將本中事情明白敷奏覽本後閣臣率領正字官恭侍上進字畢若上欲再進煖閣少憩閣臣等仍退至西廂房伺候若不進煖閣閣臣等即率講官再進午講講通鑑節要通鑑講完以貞觀政要進講講官務將前代興亡事實直解明白講畢各退上還宮

蕙田案經筵之禮始于宋代所以講明正學涵養德性預防非幾之萌沈潛道義之奧故論者謂經筵之重與宰相等程子所謂人主一日之中親賢士大夫之時多親宦官宮妾之時少自然氣質變化德器成就其所繫不

五禮通考卷一百七十二  
三  
綦重哉明代于經筵之外別有日講午講諸  
儀略相彷彿今竝纂輯附于視學之後蓋宮  
廷之與膠序其地雖不同而承師問道之心  
則一也

右經筵日講

